

2 Coodintoidi inänite Pabodo cadota ante ayænta nänö yewæmongainta

Waa quëwencæminimpa, ante

¹ Wængonguï pönö angä beyæ Itota Codito botö Pabodobo imote da godongä godongaïmo inte botö mönö tönñacä Timoteo tönö guëa apænemöna ate botö iïmaï ante yewæmömopa. Coodinto iñömö quëwëmini inte minitö iñömö Codito ingante mini godongämæ pönencabo incæ acæminimpa, ante yewæmömopa. Ayæ Acayabæ tömäo iñömö quëwente Wængonguï quïnäni inte tömënäni adobaï adota acädänimpa, ante yewæmömopa. ² Mönö Awënë Itota Codito tönö Mæmpo Wængonguï tönö guëa waadete pönö cæda adinque minitö gänë pönente waa quëwencæminimpa, ämönapa, ante yewæmömopa.

Codito iïmaï waadete pönö cæcampa, ante

³ Mönö Awënë Itota Codito Wæmpocä iñongante Itota iñömö adocä ingante, Botö Wængonguï inongä ingampa. Ayæ Itota Wængonguï adocä inongä inte tömengä mönö wæwënö ante adinque godongämæ wæte bai pönö waadete apænecä ëñëninque mönö wampo pönëmö imopa. Mänömaï beyæ, Itota Mæmpo Wængonguï cöwë waa cæcampa, ante mönö watapæ apænecæimpa. ⁴ Adocä Wængonguï mönö imonte äninque, Wënæ wënæ wæwëmini adinque botö waadete pönö apænebo ëñëninque minitö wampo pönëmïnitapa. Ininque wadäni wënæ wënæ wæwënäni adinque minitö botö apænedö ante waadete godö apænemini ëñëninque tömënäni

wæætē wampo pönencædänimpa, ante botō mīnitō īmīnite pönō cætabopa, Wængonguī angampa.

⁵ Edæ īīmaī beyæ mǎnōmaī angampa. Codito nē nantate wægaingā beyæ nantate wæwēninque mōnō tō-mengā tōnō āanque baī nantate wæwēmōmpa. Ayæ adobaī nantate wæwēmō adinque adocā Codito waadete pönō apæncā ēñēninque mōnō tōmengā tōnō āanque baī ēwocadinque wampo pōnēmōmpa. ⁶ Mōnitō nantate wæwēmōni amīnitawo. Edæ mōnitō nantate wæwente apænemōni beyæ Wængonguī mīnitō īmīnite wæætē pönō waadete apænecampa. Apænecā ēñēninque mīnitō wæætē wampo pōnēninque wænāmaī quēwencæmīnimpa, ante Wængonguī cæcampa. Ayæ mōnitō wæwēñōmōnite tōmengā pönō waadete apænecā ēñente wampo pōnēmōni amīnitawo. Edæ mīnitō nantate wæwēmīni inte wampo pōnencæmīnimpa, ante Wængonguī mǎnōmaī cæcampa. Ayæ wampo pōnēmīni badinque mīnitō īīncayæ ate mōnitō nantate wæwēnō baī adobaī nantate wæwēmīni incæte piyænē cæte ee cæte quēwencæmīnimpa, ante Wængonguī pönō cæcampa. ⁷ Ayæ mōnitō tōnō āanque baī mīnitō nantate wæwēmīnitawo. Edæ tōmengā waadete pönō apænecā ēñēmīni ate mīnitō adobaī mōnitō tōnō āanque baī wampo pōnenguīmīni īmīnīpa. Ante do ēñēninque mōnitō, Nāwangā mīnitō watapæ quēwencæmīnimpa, ante do pōnēmōnīpa.

⁸ Īñānāni, mōnitō Atiabæ quēwēninque æbānō wēnæ wēnæ bate wætamōnīi, ante ñōwo yewæmōmo aedāni. Tæī piñæmōni īnāmaī inte mōnitō godōmenque teēmē mongænte baī nanguī wēnæ wēnæ bate wædinque, Nangæ bate wænguī wæ, ante wætāmōnīpa. ⁹ Wængonguī do angā wænguēnēmōni īmōnīpa, ante nāmāneque pōnente wætāmōnīpa. Incæte mōnitō, Tōmēmōni nāmā tæī piñænō beyænque

quëwencæmönimpa, ante pönënamai incæmönimpa, ante odömoncæte ante Wængongui pönö cæcä wætamönipa. Wæætë tömengä, Do wængainäni quëwencædänimpa, ante botö nê ämo iñömote minitö wæætë botö imote wede pönente quëwencæminimpa, ante cæcæte ante Wængongui mänömai pönö cæcä wætamönipa. ¹⁰ Mönitö mäninö möni oo wænguinque ante wøyömönite tömengä do bæi ongonte ængä beyænque quëwentamönipa. Ayæ ate wøyömönite tömengä ængä beyænque quëwencæmönimpa. Ayæ, Adocä wæætë wæætë ængä beyænque quëwencæmönimpa, ante pönëninque mönitö tömengä ingante wede pönente tomönipa. ¹¹ Iñinque minitö iñacabo gongænte bai mönitö beyæ Wængongui ingante apænemini ëñëninque tömengä cöwë bæi ongonte ængä beyænque quëwencæmönimpa. Mänömai cæcä adinque nangui inäni wæætë Wængongui ingante waa ate pönente iïmai ante apænecædänimpa. Wængongui ëñëmi. Nangui inäni apænedäni ëñëninque bitö Pabodoidi beyæ pönö waa cæbi amönipa, ante apænequinäni inänipa.

Coodinto iñömö quïnante pönämai imoi, Pabodo angampa

¹² Mönitö iïmai ante nämä waa ate pönëninque apænemönipa. Wængongui quimöni inömöni inte mönitö tömengä, Tæiyæ waëmö ëwocæminimpa, ante ænte entawëmönipa. Mänömai beyæ Wængongui nö cæcä bai mönitö adobai inguiipoga quëwëninque nö cæte quëwëmönipa. Ayæ minitö weca pöninque mönitö godömenque waa cætamönipa. Mänömai cædinque mönitö inguiipoga quëwënänique näni ëñënö beyænque dicæ cætamöniyaa. Wæætë mimö entawëmöni inte nämä apænte äninque mönitö Wængongui waadete pönö apænecä ëñëninque eyepæ cætamönipa, ante tomönipa.

¹³ Minitö acæminimpa, ante yewæmöninque mönitö dicæ

idiquibæ ante yewæmömöniyaa. Wæætë, Edonque adinque do ëñencæmīnimpā, ante edonque yewæmömöni abāimīnīpā. Ayæ botō, Mīnitō nāwangā godōmenque ëñencæmīnimpā, ante īīmaī ante pōnēmopā. ¹⁴ Mōnitō æbānō īmōnī, ante mīnitō pancaā ante do ëñēmīnīpā. Ayæ, Mōnō Awēnē Itota tōmengā nānō ponguīōnæ īinque bayonte mōnitō mīnitō īmīnite adinque, Mīnitō nē wede pōnengāimīnī īmīnīpā, ante adinque tocæmōnimpā, ante do ëñēmīnitawo. Ayæ māniōnæ bayonte mōnitō īmōnite adinque mīnitō adobāi, Waa nē cægāimīnī īmīnīpā, ante tocæmīnimpā, ante āmo ëñēmāimīnīpā.

¹⁵ Mānōmaī impā, ante pōnēnīnque botō, īīmaī cæcæboimpā, ante pōnentabopā. Wayōmō ayæ godāmaī inte botō tāno mīnitō wecā ponte waadete apænecæboimpā. Apænebo ëñēnīnque mīnitō wæætë mempoga tocæmīnimpā, ante īīmaī cædīmo intabopā. ¹⁶ Mīnitō wecā tāno ponte ëñadinque godōmenque godinque botō Māatedōniabæ gote pōnīnque wæætë mīnitō wecā adodō ocæ ãmænte poncæ cædīmo intabopā. Ayæ pōmo ate mīnitō botō īmote godongāmæ cædinque da godōmīnī godōmenque Oodeabæ gocæ cædīmo intabopā. ¹⁷ Incæte botō, Mānōmaī cæquīmo īmopā, ante pōnēnīnque dicæ ōnonque ante pōnentawogāā. Mānōmaī pōinēmo inte botō nīmpo cæte pōnāmaī īmo adinque mīnitō, Pabodo æmæ pōnente, Wīī pōinente wabānō wīī pongā, ante pōnēmīnitawo. Īñæmpā inguipogaque quēwēnānī mānōmaīnō ante nānī æmæ pōnēnō baī botō īñōmō edæ dicæ adobāi pōnentawogāā.

¹⁸ Wængonguī nāwangā mōnō īmonte cōwē pōnēnīnque nē aacā īngampā, ante nō pōnī impā. Mānōmaīnō ante nō pōnī ī baī mīnitō īmīnite mōnitō apænedō īñōmō adobāi nō pōnī impā. Īnīnque mōnitō ædō cæte wadō ante apænequīmōnī. ¹⁹ Tidibānō tōnō Tīmoteo botō tōnō

mīnitō weca pōninque, Wængonguī Wengä Itota Codito ingampa, ante nō impa, ante apænemōni ēñēmīnitawo. Īninque mōnitō Itota Codito nempo quēwēninque nē Ao ämōni inte ædō cæte æmæ pōnente bai wadō ante apænequīmōnii. ²⁰ Īimai impa. Wængonguī, Cōwē cæcæboimpa, ante æpogamē wæætē wæætē angacäimpa. Wæætē wæætē angä incæte Codito iñmō edæ cōwē Ao äninque, Wængonguī nänō angainō tōmänō iinque cæcäimpa, ante cæcampa. Īninque mōnitō tōmengä tönō cædinque, Wængonguī ñäō apäite bai emōñongante tōmänäni tōmengä ingante waa acædänimpa, ante cædinque, Ao, mänōmaī impa, ante, Amëë, ante watapæ apænemōnipa. ²¹ Wængonguī incæ mōnitō imōnite apænte æninque ayæ mīnitō imīnite apænte æninque, Mīnitō Codito nempo quēwēninque nē tæi pñämīni bacæmīnimpa, ante mōnō tōmämō imonte pōnō öni pæte bai cædinque iimai cæcampa. ²² Tōmengä emōwo yewæmonte bai cædinque, Botō quīmīni imīnipa, ante pōnō cæcampa. Ayæ, Īncayæ ate mīni godōmenque nanguī ænguinque mīnitō ñōwo botō Önōwoca ingante ænte ewocaedäni, ante tōmengä Önōwoca ingante ñōwo da pōnongä ænte ewocamīnipa.

²³ Īninque Coodinto iñmō botō quīnante wæætē pönämaī ingaboī. Edæ wënæ wënæ cæmīni adinque mīnitō imīnite nē panguënemo incæ botō, Wīi päinente awädō, ante wīi pontabopa. Wængonguī ayongante botō, Mänōmaī impa, ante nō apænebo ēñëmaimīnipa. ²⁴ Īimai ante wede pōnencæmīnimpa, ante mōnitō dicæ nē wææ ämōni imōniyaa. Wæætē edæ, Mīnitō mīni wede pōnēnō beyænque tæi ongōninque edæ nanguī cæmīnipa, ante adinque mōnitō wæætē, Mīnitō watapæ tocæmīnimpa, ante cædinque mīnitō tönō godongämæ cæmōnipa.

2

¹ Botö wëenëñedë mīnitö weca ëñacæ pōninque nanguī ämo wæmīnitapa. Īninque, Wīi wæætë ämo wæcæmīnīmpa, ante ñōwo ëñacæ pōnāmaī incæboīmpa, ante nāmāneque pōnēninque antabopa. ² Edæ pīimo wæwēmīni baī æcānō wæætë, Tocæbiīmpa, ante botö ĩmote waadete pōnente apænequēngää. Īñæmpa botö pīimo beyæ nē wæwēnīmīnique ongōmīni baī botö ĩmote nē waadete pōnente apænequēngä ĩñōmō edæ dæ ancædongäīmpa. ³ Botö quīēmë beyæ tobo adīnque mīnitö godongāmæ watapæ toquēnēmīni ĩmīnīpa, ante pōnentabopa. Mīnitö botö beyæ äninque, Pabodo mönō weca pongä adīnque mönō cæmō tocæcäīmpa, ante nē cæquēnēmīni ĩmīnīpa, ante awædö. Īninque, Mīnitö weca pōninque botö mīnitö wæwënō ante wædāmaī incæboīmpa, ante cædīnque botö, Botö cadota ante yewæmōmo adīnque mīnitö ëñente cæcæmīnīmpa, ante wæbopa. ⁴ Botö nanguī caate wædōmo inte mīmōnoque pōnente wæwēninque yabæque adobaī Ca ca nanguī pōnente wædīnque mänōmaīnō ante wæbopa. Incæte botö, Mīnitö wæwencæmīnīmpa, ante dicæ ämogaa. Wæætë, Botö æbānō mīnitö ĩmīnite nanguī waadete pōnēmopa, ante ëñencæmīnīmpa, ante odōmoncæte ante yewæmōmopa.

Në wiwa cæcä ingante æbānō godö waadete ñīmpo cæquīi

⁵ Adocanque wiwa cæcä adīnque botö tōmengä nānō wiwa cædö beyæ wæwëmo incæte mīnitö tōmāmīni wædænque incæ nanguī incæ wæwēmīni adobaī ĩmīnīpa. Botö, Tōmengä ingante pīināmaī incæboīmpa, ante pōnēninque, Wædænque wæwēmīnīpa, ante apænebopa. ⁶ Nē ëñēnāmaī cædingä ingante mīnitö pancamīniya wodo tōmāmīni do pāmīnitapa. Īninque botö, Idæwaa pāmīnīpa, ämopa. ⁷ Tōmengä, Ancaa

pämīni awædö, ante godömenque wæwente bacantawo. Īnīnque mīnitö pönö ñīmpo cædinque tōmengä ingante, Idæwaa pämōni wæbīpa, ante ædæmō waadete apænemīni ēñēnīnque tōmengä īīnque wædinque wampo pōnencæcāīmpa. ⁸ Mīnitö wæætē, Bitö īmite nāwangä waadete pōnēmōnīpa, ante adodö apænemīni ēñencæcāīmpa, ante botö mīnitö īmīnite nangūi āmopa. ⁹ Botö änö ante æbānö tōmānö ante ēñente cæmīnīi, ante ēñencæte ante botö wēēnēñedē yewæmontabopa. Eyepæ cæmīni ate wædinque botö, Eyepæ cæmīnīpa, āmopa. ¹⁰ Nē ēñēnāmaī cæcä ingante mīnitö ñīmpo cæmīni ee gocantawo. Mānōmaī cæmīni īnīnque botö ñōwo adobaī ñīmpo cæbopa. Waocä æcāmenque ēñēnāmaī cæcä adīnque godö pönö ñīmpo cæbo īnīnque botö Codito ayongante mīnitö beyænque ante mānōmaī godö ñīmpo cæbo intabopa. ¹¹ Īñæmpa Tatāna incæ angä ēñente beyænque mōnö oda cæte wæquinque edæ godömenque pīīmaīmōmpa, ante aquēnē quēwēedāni. Tatāna æbānö, Oda cæte wæcædānīmpa, ante cæcāmpa, ante edæ do ēñēmōmpa.

Tito beyæ ante Pabodo wæcāmpa

¹² Botö Todoa nāni quēwēñōmō tāno pōnīnque, Mōnö Codito ingantedö ante watapæ apænecæte ante cæyōmo mōnö Awēnē, Botö beyæ guiite apænee, ante odemö wi ænete baī do cæcä atabopa. ¹³ Incæte botö tōñīñacä Tito dæ angä wædinque botö, Ædö cæte īñōmō a on-gonte apænequīmoo, ante tōmēnāni īñānīte, Gobopa, ante Māatedōniabæ gocæte ante wadæ gotabopa.

Codito nempo quēwēnīnque tæi ēmōmōnīpa, ante

¹⁴ Nē tæi ēmongä inte mōnö Codito īñōmō nē pūīnte cædāni īñānīte gānā cæcāmpa. Īnīnque mōnitö Codito

nempo quēwēñōmōnite Wængonguī, Nē tæi ēmongā ingante waa acædānīmpa, ante cædinque mōnitō ïmōnite nē tæi ēmongā miñæ ænte māocā dao dao godinque mōnitō tōmengā nānō ēmōnō bai adobai tæi ēmōmōnipa. Ayæ oguī wa woboyæ wodo wodo cædinque tōmāo māo oguī wa bai Wængonguī adobai cædinque mōnitō ïmōnite angā ēñēnīnque mōnitō wæætē, Mōnō Codito æbānō ingāā, ante wayōmō wayōmō māo apænemōni ēñēnānipa. Wængonguī mǎnōmǎi cæcā beyæ mōnō Wængonguī ingante waa ate pōnēnīnque apænecæīmpa.

¹⁵ ïmaī edæ impa. Codito ængā beyænque nē quēwenguīnāni weca quēwēmōni incæ nē wænguināni weca quēwēmōni incæ mōnitō Codito nempo quēwēnīnque tōmengā nānō oguī wamōnedō bai mōnitō adobai, Wængonguī wē ongonte bai tocæcāīmpa, ante oguī wamōnete bai apænemōnipa. ¹⁶ Mōnitō öö wa wamōnete bai cædinque nē wænguināni inānite tōmēnāni nāni wænguimāmo ante apænemōni ēñēnīnque tōmēnāni nāni wænguinque wē ongonte ocado cæte bai ēñēnānipa. Wæætē oguī wamōnete bai mōnitō nē quēwenguīnāni inānite guiquēnē tōmēnāni nāni quēwenguimāmo ante apænemōni ēñēnīnque tōmēnāni wæætē nāni quēwenguīnque wē ongonte ocado cæte bai ēñēnānipa.

Ïnīnque mǎnīnō mōnitō cæquēnēnō ante æcānō eyepæ cæquingāā. ¹⁷ Edæ nanguī ināni nāmā beyænque ante æncæte ante cædinque Wængonguī nānō apænedō ante apænewēnāni bai mōnitō wīi adobai wēnæ wēnæ cæcæte ante apænemōni ïmōnipa. Wæætē Wængonguī mōnitō ïmōnite da godongā godinque māo nē apænemōni inte mōnitō Wængonguī ayongā mōnō Codito nempo quēwēnīnque nō pōnente apænemōnipa.

3

Wængonguī miīne pōnō angā beyænque quēwēmōmpa

¹ Mönitö imönitedö ante pönëninque minitö, Pabodoidi, Waa cæmöni aedäni, ante tedewënanipa, ante wëenëhedë ämïnitawo. Ayæ, Ñowo wæætë adodö ante tedewënanipa, ante piïmïnitawo. Mönitö iïnæmpa nämanque ante, Waa cæmöni aedäni, ante dicæ ämöniyaa. Wadäni mönitö imönite waa acædänimpa, ante cædinque pancadäniya guiquënë minitö imïnite äninque, Cadota ante pönö yewæmöedäni, änäni ëñëninque yewæmömïni ate tömënäni ænte mäo odömönäni adäni. Ayæ wadäni inänite adobaï, Cadota, änäni ëñente yewæmönäni æninque minitö imïnite odömönäni. Mönitö guiquënë, Cadota ante pönö yewæmöedäni, ante dicæ ämöniyaa. ² Wæætë minitö guiquënë waa quëwëmïni adinque wadäni, Pabodoidi tömënäni inänite apænedäni beyænque coodintoidi wede pönënäni inte waa quëwënäni amönipa, ante pönëninque cadota ate baï do ëñënäni. Mänömaï pönö cæmïni æninque mönitö cadota næænte odömönte baï cædinque, Coodintoidi æbänö waa cædänii, ante tömänäni inänite odömömöni adinque ëñënäni. ³ Ininque, Pabodoidi apænedäni beyænque waa cædänipa, ante edonque acædänimpa, ante cædinque Codito iïnömö Wængonguï në Quëwengä Önöwoca ingante da pönongä ænte ëwocaminipa. Mänömaï cædinque Codito cadota ante yewæmonte baï pönö cædinque wïi tömengonca yewæmongampa. Wïi dicaboga yewæmöninque tömengä Önöwoca ingante minitö baonga da pönongä ænte ëwocaminipa.

⁴ Codito godongämæ cæcä beyænque mönitö Wængonguï ayongä nöingä ante apænemönipa, ante pönëninque mönitö guïñenedämaï inte do edæ apænemönipa.

⁵ Mönitö nämanque ante, Æbänö waa cæmöni, ante eyepæ imönipa diyæ apænte anguïmönii. Wæætë Wæn-

gonguinque pönö godongämä cäcä ate mönitö eyepä badinque cämönipa. ⁶ Wængongui, Botö pönö cæbo ate mīnitö Ao ämīni ĩnīnque mönö godongämä waa cæte quëwengäïmpa, ante cöwë angampa. Tömengä doyedë ĩñömö, Botö wææ angäinö ante ëñente cædīnque quëwencæmīnīmpa, ante nänö wææ angäine ante ñöwo wæætë änämaï ingampa. Mänīne ante ñöwo ganca wææ angä baï mönö wænguinque incædönīmpa. Nöwo guiquënë Wængongui wæætë, Botö Önöwoca ingante ænte ëwocadinque quëwencæmīnīmpa, ante mīine ante apænecä ëñēnīnque mönö quëwenguinque Wængongui Önöwoca ingante ænte ëwocamōmpa edæ. Mönitö ĩñömö tömengä Önöwoca ingante nē ëwocamōni inte eyepä badinque mīine Wængongui ñöwo nänö pönö apænede ante nē apænemōni ĩmönipa.

⁷ Wængongui, ĩmaï cædäni, ante dicaboga wææ yewæmongä ate mönö ëñēnämaï ĩmö beyænque mänīne tömengä nänö wææ yewæmongäine beyænque mönö wænguimāmo bagatīmpa. Incæte mänīne beyæ edæ ñäö nanguï apäigatīmpa. ĩnīnque mänīne ænte godömenque wææ änīnque Möitee wodi awinca ñäö apäite baï ëmongacäīmpa. Mänīi ñäö wodëmæmö ëmongä incæte idægoidi tömengä awinca adinque, Ædö cæte Möitee awinca cöwä aquīmōnii, ante wægadänīmpa.

⁸ Mönitö guiquënë, Wængongui Önöwoca ingante ænte mönö quëwengäïmpa, ante möni apænedö beyænque quiëmë baï godömenque nanguï apäite baï apäicæīmpa. ⁹ Mönö apænte tente wænguinque edæ mänīne pedæne ante ëñēnämaï cægamöīmpa. Incæte mänīne ante nänö wææ angäinö beyænque Möitee wodi awinca ñäö apäite baï ëmongacäīmpa. ĩnīnque ñöwo ĩñömö, Mönö nö cæte quëwenguinque ante Wængongui Önöwoca ingante ængäīmpa, ante möni apænede guiquënë ñäö quiëmë baï

godömenque nanguï nāwante bai ēnepa. ¹⁰ Wængonguï Tæiyæ Waëmö Önöwoca ingante ante möni apænedö iñömö godömenque ñäö nänö apäidö beyænque Möitee wodi nänö wææ angainö guiquënë pönömenque apäidinque edæ wodëmäa badinque edæ dæ bapa. ¹¹ Edæ mänine mönö wodëmäa baquënëmämo incæ ñäö apäite bai iñonte Möitee wodi ænte apænegacäimpa. Wængonguï ñöwo nänö pönö äne guiquënë cöwë wodëmäa badämaï ēne inte godömenque nanguï guinæ nāwante bai ēnepa.

¹² İninue, Wængonguï Tæiyæ Waëmö Önöwoca pönö cæcä beyænque mönö nö cæte watapæ quëwengäimpa, ante pönente quëwëmöni inte mönitö guññenedämaï inte do apænemönipa. ¹³ Möitee wodi guiquënë, Ñäö apäi bai botö ëmönö incæ wodëmäa bamöñömote idægoidi adämaï incädänimpa, ante cædinque weocoo ñäne cæmongacäimpa. Mönitö guiquënë Möitee wodi nänö ñäne cæmongaï bai cædämaï imöni inte edonque apænemönipa. ¹⁴ Mäninta, Botö wææ angainö ante ëñente cædinque quëwencæminimpa, ante Wængonguï nänö pedænta ante adinque idægoidi do nani ñäne cæmongaincöo ñöwo ganca edæ ñäne cæmonte bai ëmönänipa. İninue tömënäni ocai ömæcadäni bai bagadänimpa. Edæ Codito nempo quëwënäni que mänincöo wi cæmonte bai ëmönäni inte tömënäni que edonque adäni inänipa. İninue idægoidi wæætë Codito nempo quëwënämaï inäni inte ayæ edæ wi cæmönämaï inte wädänipa. ¹⁵ İninue idægoidi ñöwo ganca mimö bee otawente bai inönäni inte Möitee wodi nänö yewæmongainta adinque ëñënämaï inänipa.

¹⁶ Incæte Awënë gämänö æcänö pöna tömengä Möitee wodi nänö wi cæmönö bai badinque do wi cætawente bai bacampa. ¹⁷ Mönö Awënë incæ Wængonguï Önö-

woca ingampa. Ayæ waocä mönō Awënë Önowoca ingante ewocacä ininque tömengä wi cætawente bai entawente quëwënongå inte wii tee mönete wacä bai ingampa. ¹⁸ Mönö tömämö iñömö awinca wi cæmonte bai emönömö inte mönō awocawænta bai bamompa. Ininque wadäni mönō imonte adinque, Mönö Awënë æbänö ñäö apäite bai emongää, ante awocawænta ate bai edonque acädänimpa. Ayæ godömenque ayæ godömenque mönō ñäö apäidö mönō ewocaquinque mönō Awënë nänö ewocadö bai mönō ayæ godömenque ayæ godömenque ewocamö imompa. Mönö Awënë incæ Wængongui Önöwoca inongä inte mänömaï pönö cæcä entawëmompa.

4

¹ Wængongui, Botö pönö cægäinö ante mīnitö nē apænemīni incæmīnimpā, ante waadete pönö angä beyænque mönitö mäninö ante nē apænemōni bagaimōni inte ñowo wæ guemönāmaï inte cōwë apænemōnimpā. ² Wadäni guiquënë tömënäni nāni guingo imonte wæquinque awëmö cädänimpā. Mönitö iñömö tömënäni nāni cæwënö bai cädāmaï incæmōnimpā, ante do änimōni inte babæ cädāmaï imōnimpā. Wængongui nänö apænedö ante idiquibæ apænedāmaï imōnimpā. Wæætë Wængongui ayongä mönitö tömengä nö nänö apænegäinö ante edonque pōni odōmonte apænemōni eñëninque tömänäni mīmō entawënäni ininque edæ, Pabodoidi nö ante cädänimpā, ante apænebainänimpā. ³ Incæte mönō Codito ingantedö ante watapæ möni apænedö iñömö ñäne cædete bai intawo. Inæmpā ñäne cædete bai i ininque nē wë womonte wænguinäni beyænque ñäne cædete bai impā. ⁴ Wængongui nänö emönö nē emönongä inte mönō Codito iñömö mönō beyæ ñäö apäite bai cæcampa, ante watapæ mönō

ēñente pönönö ante apænemönipa. Nöwoguipogaque quëwëñani beyæ guiquënë tömënäni awënë wængongui bai Tatäna në cæcä ingampa. Tömengä iñömö mänine watapæ möni apænedö ante pïinique, Në pönëñamai inäni adämai incädänimpa, ante tömënäni awinca ñäne cæmonte bai wææ cæcampa.

⁵ Mönitö iñömö, Nämä incæ waa cæmönipa, ante ted- edämai imönipa. Wæætë, Itota Codito incæ mönö Awënë ingampa, ante mönitö, Tömengä beyænque mönitö minitö iminite në cæmöni imönipa, ante mäninque ante apænemönipa. ⁶ Wëmö iñömö ñäö apäicæimpa, ante Wængongui incæ badongacäimpa. Adocä ñäö ante në angaingä inte ñöwo wæætë mönitö mïmöno tica ënente bai cædinque iïmai ante odömongä amönipa. Tömengä iñömö, Botö æbänö guinä näwante bai ëmömoo, ante minitö Codito awinca adinque edonque pöni acæmïn- impa, ante pönö tica ënente bai odömongä amönipa.

Itota ingante mönö wede pönönö beyænque quëwëmö

⁷ Nanguï ñäö apäite bai ewocamöni incæ önoncadedë mante bai edæ ewocamönipa. Edæ daigäñë cængæmon- cadenque bai mönitö baö mongæñömönite Wængongui, Wïi minitö nämä täi pïñänö beyænque ewocamïnipa, wæætë botö täi pïñänö beyænque ewocamïnipa, ante acädänimpa, ante badongampa. Ìninqe tömengä täi pïñante pönö badongä æninque mönitö ñäö apäidö möni mänö iñömö önoncadedë mante bai ewocamönipa. ⁸ Mönitö imönite tömänö mämö mö ongonte bai cädäni wämöni incæ gueogæ godämai imönipa. Æbänö cæte quëwëmö imöö, ante wämöni incæ mönitö guïñente wädämai imönipa. ⁹ Ancaa togænte pänäni wæyömöni Wængongui mönitö imönite cöwë ëmö cæte godämai ingampa. Ayæ wænoncæte ante bæ tadäni incæte æmæwo wænāmai imönipa.

¹⁰ Itota tömengä nänö quëwënö pönongä ämöni beyænque mönitö, Baö ayäë mongænte quëwëmöni acädänimpa, ante cämönipa. Tömengä nänö wængainö bai mönitö adobai wæætë wæætë wænte bai baö mongäëmönipa. ¹¹ Mönitö në quëwëmöni iñömönite wadäni wæætë mönitö imönite bæi ongonte äninque, Itota beyænque wæncæminimpa, ante nanguï cädänipa. Ìninque mönitö baö ñömænguïñö ëñayömönite wadäni, Itota tömengä nänö quëwënö ëñate beyænque ayäë quëwënanipa, ante edonque acädänimpa, ante mönitö wæncæ cæte bai ëñate wæmönipa. ¹² Ìninque mönitö möni wænguimämo beyäë ante wæyömöni minitö wæætë mini quëwenguimämo ëñate quëwëminipa.

¹³ Docä do apäenedinque, Botö në wede pönëmo inte apänetabopa, ante yewæmongacäimpa. Tömengä wede nänö pönengainö bai adobai ëwocadinque mönitö në wede pönëmöni inte adobai apänemönipa. ¹⁴ Ìmaïnö ante ëñëninque wede pönëmöni inte mönitö apänemönipa. Itota ingante, Ñäni ömämöe, ante në cægäingä adocä mönitö imönite angä ate mönitö Itota tönö godongämäë ñäni ömæmoncæmönimpa, ante do ëñëmönipa. Ayäë minitö tönö mönitö tömämö iñömonte Wængonguï ænte mämö gönongä ate mönö tömengä weca godongämäë gongænguimö imompa. Mänömaïnö ante do ëñëmöni inte mönitö në wede pönëmöni inte apänemöni imönipa. ¹⁵ Wængonguï godömenque nanguï inäni inänite waadete pönö cæcä ate tömënäni wæætë Wængonguï ingante waa ate pönëninque apä necädänimpa. Ayäë mänömaï pönö cæcä adinque, Wængonguï ñäö apäite bai ëmönongä inte mänömaï cæcampa, ante mönö tömämö watapæ apä necäëimpa. Ìninque, Mänömaï bacäëimpa, ante minitö beyäë ante mönitö tömää edæ cämönipa.

¹⁶ Mänömaï beyæ mönitö, Æbänö cæquimöni, ante wädämaï imönipa. Edæ iimö iñö iimö iñö mönö baö godömenque wænguiñö bai mongæñömö mönö önöwoca wæætë iimö iñö godömenque iimö iñö godömenque miïwoca badonte bai ewocamompa. ¹⁷ Ìñæmpa wënæ wënæ mönö wæwënö incæ wantæ iñö wodëmää pönï badinque wodæi bai bapa. Incæte mänii mönö wæwënö beyæ mönö godömenque ñäö apäite bai ewocacæimpa. Ìninqe mönö wæwënö wodæi pönï inte dæ bayö mönö ñäö apäidö mönö ewocadö wæætë cöwë wodëmää badämaï ingæimpa. Wæætë mönö watapæ quëwenguinque godömenque nanguï apäite bai bacæimpa. ¹⁸ Inguipogaque mönö quëwënö guiquënë wantæ iñö dæ gocoopa. Öönädë ñöwo mönö adämaï incoo guiquënë cöwë dæ badämaï inte ongongæimpa. Ìninqe inguipogaque mönö quëwënö ante mönö adämaï inte bai pönengæimpa. Wæætë öönädë mönö adämaï incoo ante mönö cöwë ate bai pönengæimpa.

5

¹ Oncontai wido cæquintai bai mönö æmontai mongænte quëwëmompa. Ìninqe mänintai wido cämö incæte Wængongui wæætë, Öönädë miïntai miïni cöwë owoquintai, ante do mænongacæimpa. Mänintai iñömö waocä önompoca mænönämaï intai iñonte mönö öönädë æite owoquimö imompa, ante do ëñëmompa. ² Ñöwo iñömö mönö wido cæquintai mongæninque ö ö ante nantate wæwëmompa. Mänömaï beyæ mönö öönädë æidinqe mönö owoquintai ëñacæte ante wæmompä. ³ Edæ, Baö ömaamö inte wæcæ wæ, ante guïñëwocate wædinque mönö, Miïntai ëñacæimpa, ante wæmompä. ⁴ Mönö iïntaique ëñadinque, Baö ömaamö inte wädämaï incämönimpa, ante guïñëwocate

wæmompā. Mönö wænguintai mongænte nantate wæmö inte ö ö ante wæmompā. Wængonguī, Mīnitö ēñate quëwænguintaique, ante yabæque wini caate bai pönongä ēñayömö mönö wænguēñēñö edæ dæ bacæimpa, ante æncæte ante wæmompā.

⁵ Nöwo ämo ēñeedäni. Wængonguī incæ edæ, Mīni mīintai wēñate mongænguinque, ante mönö imonte badongacäimpa. Ayæ, Mīnitö mīintai cöwë pönömo æncæminimpa, ante, Näwangä impa, ante odömoncæte ante Wængonguī tömengä Önöwoca ingante ñöwo da pönongä æmompā. İninqe tömengä Önöwoca ingante ænte ewocadinque mönö, Mīintai ēñate mongænguinque ewocamompā, ante do ēñëmompā.

⁶ Mänömaī beyæ mönitö cöwë, Wængonguī cæcæcäimpa, ante wede pönente tomönipa. Oncönë owote bai iintaidë mönö quëwenganca mönö Awënë oncönë owodämaī imompā, ante do ēñente wædinque, ⁷ mönitö mäninö ante ayæ adämaī emömöni inte wii möni adinö beyæ quëwëmönipa. Wæætë möni wede pönënö beyænque quëwëmönipa. ⁸ İninqe edæ, Wængonguī cöwë cæcæcäimpa, ante wede pönëmöni inte mönitö, İntaidë owodämaī inte wæætë mönö Awënë oncönë gote owote waa tobaimpā, ante pönëmönipa. ⁹ İninqe oncönë owote bai tomöni incæ oncönë owodämaī inte bai wæmöni incæ mönitö, Mönö Awënë waa tocæcäimpa, ante cædinque cöwë nö cæte quëwëmönipa. ¹⁰ Codito tömengä nänö apænte anguimpaa gäänë mönö tömämö ponte edæ a ongonguēñëmö imompā. Mönö edæ inguipoga iintai ēñate quëwëninque mönö cædö ante do againgä inte tömengä iñömö apænte ancæcäimpa. Edæ waa cægäimö imö adinque tömengä mönö imonte edæ eyepæ pöni pædæ pönongä ænguimö imaimompā. Wæætë edæ wënæ wënæ cægäimö imö adinque tömengä

wæætē eyepæ pōnī pangā wæbaimompa.

Wængonguī piyænē cædinque, Pōedāni, angampa

¹¹ Īninqe mōnō Awēnē ingante guīñente wæmōni inte mōnitō waodāni ĩnānite godō waadete apænemōnipa. Codito gāmænō pōninqe watapæ quēwengæimpa, ante pōnencædānimpa, ante mōnitō godō waadete apænemōnipa. Edæ, Mōnitō æbānō ēwocamōnii, ante Wængonguī do edonque acampa. Ayæ adobaī mīnitō mīmō entawēmīni inte mōnitō ēwocadō ante edonque amīni ĩninqe botō waa tobaīmopa. ¹² Mānōmaīnō ante apænedinque mōnitō, Waēmō pōnī ĩmōnipa, ante nāmā ante dicæ āmōniyaa. Wæætē iīmaī ante apænemōnipa. Pancadāniya ĩñōmō mōnitō awincaque adinque, Pabodoidi æbānō ēwocadānii, ante adāmaī ĩnāni inte tōmēnāni nāni adōnonque ante pōnēninqe nāmā ængō cæte baī todānipa. Mīnitō guiquēnē, Mōnitō æbānō ēwocamōnii, ante do amīnitapa. Īninqe tōmēnāni mōnitō ĩmōnite ante piinte ānāni ēñēninqe mīnitō wæætē edæ, Pabodoidi nō ēwocadāni inte waa cædāni amōnipa, ante wææ apænecæmīnimpa, ante cæbopa. ¹³ Edæ ōmæcamōni baī cæmōni incæte Wængonguī beyænque ante mānōmaī cæmōnipa. Wæætē nō pōnente cæmōni incæ mīnitō beyæ ante cæmōnipa.

¹⁴ Īimāinō ante pōnente wædinque edæ mānōmaī cæmōnipa. Tōmāmō beyæ adocanque wængacāimpa, ante adinque mōnitō, Mōnō tōmāmō do wængamōimpa, ante edonque ēñēmōnipa. Īninqe, Mōnō Codito nanguī waadete pōnengā inte pōnō cæcampa, ante pōnēninqe mōnitō ædō cæte wapiticæ cæquīmōnii. ¹⁵ Mōnō Codito ĩñōmō tōmāmō beyæ wæninqe, Mīnitō idæwaa nāmā beyænque quēwēmīnipa, ante wængacāimpa. Ayæ, Botō nē wænte nāni ōmæmongaimo ĩñōmote mīnitō

botö beyæ ante quëwencæminimpa, ante cædinqe tömengä tömämö beyæ wængacäimpa. ¹⁶ Mänömaï impa, ante pönëninque mönitö ñowo iincayæ ate waodäni inänite adinque, Inguipogaque ëñate quëwënänipa, ante pönënämaï imönipa. Edæ mönö Codito incæ inguipoga ëñate quëwëñongante mönitö mänömainö ante pönengaimöni incæte mönitö ñowo wæætë mänömainö ante wii pönëmönipa. ¹⁷ Ìninqe Codito nempo æcänö quëwënaa tömengä ingante Wængonguï miingä badongä ate miingä bate quëwengampa. Tömengä nänö inguipogaque nänö quëwënimämo edæ dæ gotimpa. Ñowo wæætë edæ miimämoque ëwocacampa.

¹⁸ Mäninö botö änö ante tömänö në pönö badongä iñömö edæ Wængonguï adocanque ingampa. Tömengä iñömö, Minitö ëñënämaï cæmïni incæte Codito pönö cæcä beyænque botö piyænë cæcæboimpa, angampa. Ìninqe botö piyænë cæbo adinque minitö botö gämænö pödäni, angampa. Ayæ mönitö imönite pönö angä ëñëninque mönitö wæætë edæ wadäni inänite, Wængonguï piyænë cædinqe, Pödäni, angampa, ante në cæmöni batamönipa. ¹⁹ Ìninqe iïmaï ante apænemönipa. Codito tönö godongämæ cædinqe Wængonguï iñömö piyænë cædinqe, Inguipoga quëwëmïni tömämïni botö gämænö pödäni, angampa. Pömïni adinque botö, Æpogadö wënæ wënæ cæmïnitawo, ante tee mante adämaï inte pünämaï incæboimpa, angampa.

Tömengä mänömaï angä ëñëninque mönitö wæætë mänine ante në waadete apænemöni badinque edæ, Wængonguï piyænë cæcä adinque pödäni, ante apænemönipa. ²⁰ Ìninqe Wængonguï mönitö imönite äninque, Minitö wæætë botö beyæ wadäni inänite waadete apænemïni ëñëninque poncädänimpa, angä ëñëninque mönitö wæætë Codito beyænque në waadete

apænemöni bamönipa. Īninqe mīnitō īmīnite waadete pönō apænedinque mōnitō, Wængonguī gāmænō pōedāni, ante Codito beyænque ante apænemönipa. ²¹ Wængonguī, Mīnitō Codito nō nānō ēwocadō ænte ēwocacæmīnimpā, ante pönō cædinque Codito ingante angā ēñēninqe tōmengā īñōmō edæ wēnæ wēnæ ēwocadāmaī inte wæætē edæ mōnō beyæ ante nē wēnæ wēnæ cæcā bai badinque mōnō wentamō ēwocadō incæ mongængacāimpā. Īninqe mōnitō tōmengā nempo quēwēninqe nō pōnī tōmengā nānō ēwocadō wæætē ænte ēwocamompa.

6

¹ Tōmengā tōnō godongāmæ nē cæmōni inte mōnitō mīnitō īmīnite īmaī ante waadete apænemönipa. Wængonguī waadete pönō cæcā æmīni inte mīnitō wīi ōnonque oda cæcæte ante æncæmīnimpā, ante nanguī āmōni ēñēmaīmīnipa. ² Edæ Wængonguī do angacāimpā, “Mīnitō īmīnite botō waadete pönō cæyedē māniñedē mīnitō apænemīni ēñentabopa.

Ayæ, Mīni quēwenguīōnæ impā, ante Codito nānō bæi ongonte æñedē botō māniñedē mīnitō beyæ pönō cægaboimpā.”

Ante yewæmongatimpā. Īninqe botō īmaī āmo ēñeedāni. Wængonguī tōmengā nānō waadete pönō cæyedē do ba apa quēwēmīni. Codito edæ ængā beyænque mīni quēwenguīōnæ īñōmō edæ do batimpā cæmīni.

³ Mōnō quēwenguīnō ante adocanque incæ Wængonguī beyæ mōni apænedō ante pīnāmaī incæcāimpā, ante wææ cædinque mōnitō īñōmō idiquibæ cædāmaī īmönipa. ⁴ Wæætē mīnitō, Pabodoidi Wængonguī beyæ

nē cædāni inānīpa, ante acæminīmpa, ante odōmoncæte ante mōnitō cōwē iīmaī cæmōnīpa. Cōwē nantate wæmōni incæ wænæ wænæ cædāni wæmōni incæ mō ongonte wææ cædāni wæmōni incæ æbāmenque wæmōni incæte mōnitō cōwē wæntæye badāmaī inte ee cæmōnīpa. Ædō cæte quēwenguī, ante wæmōni incæ Wængonguī beyæ nē cæmōni inte mōnitō godōmenque cæmōni aedāni. ⁵ Ayæ tæi tæi pānāni wæmōni incæ tee mōnedāni wæmōni incæ Yæ yæ ante mōnitō imōnite wido cædāni incæte mōnitō wæætē Wængonguī ingante nē cæmōni inte edæ nanguī cæmōnīpa. Ayæ woyowotæ nanguī cædinque mōnitō mōwo mōnāmaī inte cæmōni incæ cænguī cænāmaī inte gæwænte wædinque cæmōni incæ mōnitō godōmenque cæmōni aedāni.

⁶ Mānōmaī cædinque mōnitō wentamō mongænāmaī inte cæmōnīpa. Ayæ wadāni æbāmenque cædāni incæ mōnitō nō ēñēmōni inte edæ piyænē cæte piinte ānāmaī imōnīpa. Wæætē waadete cæmōnīpa. Edæ Wængonguī Tæiyæ Waēmō Ōnōwoca nempo quēwēnīnque nāwangā waadete pōnēmōnīpa. ⁷ Wængonguī nānō tæi pīñænō ēwocadinque mōnitō Wængonguī nō nānō angainō ante apænēmōnīpa. Ayæ tontadoidi guēadō guēa wænoncæte ante tipæmāa næænāni baī cædinque mōnitō nō pōni cæcæte ante Wængonguī nānō tæi pīñænō ante eyepæ næænte baī cæmōnīpa.

⁸ Mōnitō imōnite waa adāni incæ wīwa adāni incæte mōnitō Wængonguī beyænque ante cæmōnīpa. Pabodoidi waa pōni cædānīpa, ante nō apænedāni incæ wæætē, Pabodoidi wænæ wænæ cædānīpa, ante tedewēnāni incæ mōnitō cōwē godōmenque cæmōnīpa. Pabodoidi babæ cædānīpa, ante pīināni incæte mōnitō nōingā pōnente Wængonguī beyænque ante cæmōni aedāni. ⁹ Edæ tōmānāni mōnitō imōnite do edonque

pöni adäni incæ adämaï inte bai cædinque, Önöminique iminipa, ante tededänipa. Wæncæ cæmöni incæte ee quëwëmönipa. Pänäni wæmöni incæte mönitö imönite wænönämaï inänipa. ¹⁰ Wæwëmöni incæte mönitö cöwë mimöno watapæ towocamönipa. Mönitö mäincoo ömæpomöni incæ wadäni inänite godö cæmöni æninque tömënäni mäincoo nanguï pöni ænte bai eyepæ pöni entawënänipa. Edæ nê ömæpomöni inte wæmöni incæte mönitö tömancoo pöni entawëmöni inte Wængonguï ingante nê cæmöni imöni aedäni.

¹¹ Coodintoidi ëñeedäni. Minitö iminite mönitö edonque pöni apænetamönipa. Minitö iminite nanguï pöni waadete pönëmönipa. ¹² Mönitö dicæ pæ gom-pote minitö iminite waadedämaï imöniyaa. Wæætê edæ tömëmïni pæ gompodinque edæ mönitö imönite waadedämaï imïni inte wæwëmïnipa. ¹³ Ìninque botö wëñæmïni bai iñöminite iïmaï ämopa. Minitö iminite waadete pönëmöni adinque minitö näëmæ waadete pönëedäni.

Wængonguï nê Quëwengä nänö owocö bai imompa, ante

¹⁴ Guëa mangæ mangæ woquïna, ante wagada tönö bodo guëa goti wëmencadämaï iedäni, ante do yewæ-mongatimpa cæminii. Pönënämaï inäni tönö godongämæ cädämaï iedäni. Iñæmpa nê nö cæcä tönö guëa äantawente bai nê ëñënämaï cæcä guiquënë dicæ adobai entawengää. Ayæ ñäö entawengä tönö guëa gocæte ante cædinque nê wëmö entawengä iñömö mimö ñäö entawengampa diyæ guëa goquingää. ¹⁵ Codito nänö pönënö ante edæ wënæ awënë Bediado iñömö edæ adodö ante pönengampa diyæ guëa cæquingää. Nê wede pönengä nänö pönënö ante nê pönënämaï ingä iñömö edæ adobai pönengampa diyæ adobai quëwenguingää. ¹⁶ Ayæ,

Wængonguī impa, ante waodāni nāni badōninca æn-
 inque edæ nāwā Wængonguī tæiyæ waēmō oncōnē ædō
 cæte mangui cō cæquiī. Mōnō guiquēnē Wængonguī nē
 Quēwengā nānō tæiyæ waēmō owoquincō bai īñomonte
 tōmengā Ōnōwoca mōnonga pō guite owocampa. Īn-
 inque tōmēnāni tōnō mōnō ædō cæte godongāmæ cæquiī.
 Wængonguī incæ, Mānōmaī impa, ante ancæte ante īmaī
 angacāimpa.

“Waodāni weca owodique botō tōmēnāni tōnō
 godongāmæ cægoncæboimpa.
 Botō tōmēnāni Wængonguī īñōmote
 tōmēnāni wæætē botō quīnāni incādānimpa,”
 angacāimpa.

¹⁷ Mānōmaīnō ante apænedinque mōnō Awēnē adobaī
 ante,

“Wadāni īnānite taayænte pōninque nānēnē ponte
 quēwēedāni, angampa.

Wentamō ī adinque gampodāmaī īedāni.

Mānōmaī cæmīni adinque botō mīnitō īmīnite, Pōedāni,
 ante ee æncæboimpa.

¹⁸ Āninque, Mīnitō Wæmpobo īnōmo inte botō,
 onguīñæmīni incæ onquiyæmīni incæ, Botō wēmīni
 īmīnīpa, ante æncæboimpa,
 ante nē Tæī Piñænongā inte Awēnē Wængonguī
 angampa.”

Ante Wængonguī beyæ yewæmongatimpa.

7

¹ Īninque botō nē waademīni ēñēedāni. Mōnō īñōmō,
 Wængonguī, Cōwē cæcæboimpa, ante nānō angāinō ante
 do ēñengamōimpa. Īninque baonga wentamō mōnō
 ēñadō tōnō mīmō mōnō wentamō entawēnō adobaī
 nā mēnongate bai cædinque edæ mōnō tæiyæ waēmō
 ēwocate quēwengæimpa. Ayæ, Wængonguī ingampa,

ante guĩñente wædinque mōnō, Cōwē nō cæte waa quēwengæimpa, ante nanguĩ cæcæimpa.

Coodintoidi Codito gāmænō pōnānipa

² Mōnitō dicæ wacā ingante wēnæ wēnæ cæmōniyaa. Wacā wentamō nānō mongænguinque mōnitō dicæ wēnæ wēnæ cæmōniyaa. Dicæ wapiticæ apænedinque wacā quĩ ö æmōniyaa. Īninquē, Pabodoidi mǎnōmaĩ cædāmaĩ ĩnānipa, ante adinque mīnitō wæætē mōnitō ĩmōnite waadete pōnēninque ēñēedāni, āmopa. ³ Mǎnōmaĩnō ante āmo incæte botō, Mīni pante wæquinque, ante dicæ apænte āmogaa. Edæ botō do antabopa. Mīnitō tōnō mōni quēwenguinque incæ mīnitō tōnō mōni wænguinque incæ mōnitō mīnitō tōnō āanque bai entawente mīnitō ĩmīnite cōwē waadete pōnēmōnipa, antabopa. ⁴ Edæ, Mīnitō nō pōnente cæmīni ĩmīnipa, ante pōnēmopa. Mōnitō apænemōni ēñēninque mīnitō nē waa cæmīni bamīnitapa, ante adinque botō mōnitō apænedō ante nanguĩ tobopa. Mīnitō mǎnōmaĩ cæmīni ĩmīnipa, ante ēñente wædinque botō gançæ pōnēmopa. Īninquē mōnitō wēnæ wēnæ inte wæwēmōni incæte botō wæætē godōmenque watapæ tobopa.

⁵ Īmaĩ edæ Mǎatedōniabæ pōninque cætāmōnipa. Æmætæ æmætæ gote apænecæte ante cæyōmōnite wadāni bæ ta bæ ta cædāni wædinque mōnitō ædō cæte guēmanguimōni. Edæ nanguĩ piinte cædāni wædinque mōnitō baonga nantate wædinque önōwoca adobai guĩñente wæwocatāmōnipa. ⁶ Incæte mōnitō wæwēñōmōnite, Nē wæwēnāni gançæ bacædānimpa, ante nē pōnō cæcā ĩnongā Wængonguĩ ĩñōmō Tito ingante da pōnongā pongā adinque mōnitō wæætē gançæ pōnentāmōnipa. ⁷ Tōmengā ponte a ongongā beyæ gançæ pōnēñōmōnite tōmengā, Coodintoidi botō ĩmote waa cædāni adinque botō wæætē gançæ pōnentabopa, ante

apænecä eñente mönitö godömenque totamönipa. Ayä botö imote ante apænedinque tömengä, Bitö imite ante nanguï aïnente wædinque coodintoidi Ca ca wædänipa. Tömënäni iñömö, Mönö ñowo Pabodo beyä ante nanguï cæcäimpa, ante wædänipa, ante Tito tedecä eñëninque botö godömenque nanguï totabopa.

⁸ Botö doyedë cadota ante yewämöninque da godömo æninque mïnitö wæwente bamïnitawo. Näwangä botö cadota beyä wæwente bamïnitapa, ante wædinque botö, Quïnante mänömaï yewämömoï, ante wætabopa. Incæte ayä ate, Coodintoidi wantæ iñö wæwëninque ñowo iñömö edæ wæwënämaï inänipa, ante adinque botö ñowo edæ, Nö cædinque yewämömoïmpa, ante piyänë cæbopa. ⁹ Edæ mïnitö wæwëmini beyä todämaï inïmo inte botö wæætë, Mïni wënæ wënæ cædinö ñïmpo cædinque mïnitö Codito gämænö mïni ponguinque wæwente bamïnitapa, ante adinque mänömaï beyænque totabopa. Edæ Wængonguï nänö änönö mïni eñenguinque wæwente bamïni ininque mönitö cædö beyä dicæ wæmïniyaa.

¹⁰ Edæ Wængonguï nänö änönö ante wæwëmö bai mönö ocä ëmænte ponte quëwenguinque impa. Ininque, Quïnante mänömaï wæwëmoï, ante wædämaï imompa. Wæætë inguipoga mönö quëwenguïmämo ante wæwëmö bai mönö wænguinque impa. ¹¹ Edæ Wængonguï nänö änönö ante do wæwënimïni inte mïnitö ñowo, Mänïnö möni wæwënö beyä æbänö entawëmönii, ante nämä aedäni. Edæ mänömaï wæwëmini inte mïnitö, Mönö ee ongönämaï inte cæcäimpa, ante do cæmïnitapa. Cædinque, Mönö pönencabo wentamö mongænämaï ingäïmpa, ante nanguï cædinque mïnitö në wënæ wënæ cædingä ingante edæ do piïmïnitapa. Ayä, Pabodo æbänö anguingää, ante guïñente wæmïni incæte botö imote ante

aïnente wæmïnitapa. Ayæ, Nē wēnæ wēnæ cædingä ingante mōnō nō ante pangæïmpa, ante do cæmïnitapa. Mänōmaï eyepæ cæðimïni inte mïnitō wentamō mongænāmaï ïmïnipa, ante edonque abaimpa.

¹² Ìnïnque mïnitō ïmïnite yewæmōnïnque botō nē wēnæ wēnæ cædingä beyæ ante wïi yewæmontabopa. Tömengä wēnæ wēnæ cæcä wædingä beyæ ante adobaï yewæmōnāmaï intabopa. Wæætē mïnitō Wængonguï ayongä nämä adïnque, Mōnitō Pabodoidi ïnänite waadete amōnipa, ante, Nāwangä ïmpa, ante edonque acæmïnïmpa, ante botō mïnitō beyænque ante yewæmontabopa. ¹³ Mïnitō mänōmaï cæmïni adïnque mōnitō wēenēñedē nē wæwēmōni inte ñōwo ïñömō gancæ pönēmōnipa.

Mïnitō waa cæmïni beyæ wēenēñedē wæwëningä inte Tito adobaï gancæ pōnente ñōwo watapæ pōnengampa, ante adïnque mōnitō do gancæ pönēmōni inte ñōwo godōmenque nanguï tomōni ïmōnipa. ¹⁴ Botō do ïnōñedē Tito ingante apænedïnque, Coodintoidi waa cæðäni abopa, antabopa. Ñōwo mïnitō waa cæmïni adïnque botō, Tito ingante botō apænedïnō nō ïmpa, ante adïnque botō guingo ïmōnāmaï ïmopa. Edæ botō mïnitō ïmïnite nōinō ante apænetawo. Edæ mïnitō ïmïnite nōinō ante apænebo baï botō Tito ingante, Coodintoidi waa cæðänipa, ante apænedïnque adobaï nōinō ante apænetabopa. ¹⁵ Ayæ Tito ïñömō, Coodintoidi tōmänäni botō ïmote waa adïnque guïñente wæðänitapa. Ayæ, Pōe, äninque tōmënäni botō apænebo ëñëninque Ao ante ëñente cæðänitapa, ante pönëninque tōmengä mïnitō ïmïnite godōmenque waadete pōnengampa. ¹⁶ Ayæ, Mïnitō cōwē waa cæmïni ïmïnipa, ante pönëninque edæ botō adobaï watapæ tobopa.

8

Mönö godömenque nanguï godongäimpa, ante

¹ Nöwo botö tönĩñadäni apänebo eñeedäni. Mäatedöniabæ iñömö Codito ingante godongämæ nani pönencabo wayömö nani cabo wayömö nani cabo ongöñönänite Wængonguï Önöwoca pönö apäneca eñëninque tömënäni wæätë waadete cædinque iïmaï cædänipa. ² Nanguï wënæ wënæ nantate wæwënäni incæ tömënäni cöwë piyänë cæte watapæ todänipa. Ìninque ömæpodäni incæte tömënäni nanguï mänäni bai cædinque, Wængonguï quïnäni quï, ante godömenque todinque nanguï gomonga godönänitapa. ³ Tömënäni edæ nani godonguënënö ganca do godöninque ayæ godömenque nanguï godönäni adimo inte botö, Näwangä impa, ante apänebopa. Ayæ edæ tömënäni nani nämä pönënö bai cædinque, ⁴ Wængonguï quïnäni beyæ impa, ante mönitö wadäni tönö godongämæ godoncæmönimpa, ante tömënäni mönitö imönite nanguï äninque ancaa änänitapa. ⁵ Mönitö guiquënë, Mäatedöniabæ quëwënäni tömënäni nani godonte äintaque godonguïnäni inänipa, ante edæ pönentamönipa. Incæte tömënäni, Wængonguï quimöni imönipa, ante edæ Wængonguï ingante nämä godöninque ayæ, Minitö iminite në cæmöni bacæmönimpa, äninque mönitö imönite edæ adobai nämä pönönänitapa. Ayæ mönitö pönënö ganca adobai godöninque tömënäni nani godonte äinta ayæ godömenque godönänitapa.

⁶ Mäatedöniabæ quëwënäni mänömaï cædäni adinque mönitö Tito ingante iïmaï antamönipa. Bitö doyedë ämi eñëninque coodintoidi waadete pönëninque tæcæ godoncæ cædänitapa cæbii. Nöwo wæätë ämi eñëninque tömënäni në waadete godönäni badinque eyepæ

godoncædänimpa, ante mönitö Tito ingante nanguï antamönipa. ⁷ Minitö iñömö wede pönëmini inte edæ nê waa pönï apænemïni iminipa. Ayæ godömenque gomonga ëñëmini inte minitö, Mönö cöwë cæcæimpa, ante nanguï cædömïni iminipa. Ayæ mönitö imönite nê waadete pönëmini iminipa. Mänömaï tömänö ante do cædömïni inte minitö ñöwo adobaï, Wængonguï quï, ante mönö nê waadete godömö bacæimpa, ante edæ nanguï cæedäni, ämopa.

⁸ Mänömainö äninque botö, Cæedäni, ante wææ änamäi imopa. Wæætë, Minitö æbänö cæminii, ante ëñencæte ante cædinque botö wadäni näni nanguï cædinö ante apænetabopa. Mänömainö ante apænedinque botö, Minitö adobaï tömënäni näni cæbaï nanguï waadete pönente cæmïnitawo, ante acæte ante cædinque, Nê godömïni baedäni, antabopa. ⁹ Minitö do ëñëmïnipa. Mönö Awënë Itota Codito öönædë quëwëninque nanguï gomonga ënempogaingä inte mönö imonte waadete pönëninque iïmaï ante pönö cægacäimpa. Botö ömæpobo babo beyænque minitö nanguï wæætë entawencæmïnipa, ante cædinque tömengä edæ minitö beyænque ante inguipoga pöninque edæ ömæpocä bagacäimpa.

¹⁰ Ayæ, Mäninö mïni godonguïnö ante æbänö cæquënëmini imïni, ante botö nämä pönëninque iïmaï ämopa. Wadepo inöñedë wadäni godönämaï iñönäni minitö iñömö edæ do täno godömïnitawo. Mönö godongæimpa, ante edæ minitö cöwë täno cæinëmini imïnitawo. ¹¹ Ininque, Mönö godongæimpa, ante quingæ änimïni inte ñöwo edæ iinque cæedäni. Mïni ëadincoo adinque minitö, Eyepæ inte botö pancacooga godoncæboimpa, ante mïni änincoo edæ godömïni adinque, Eyepæ godömïnipa, ante acæimpa. ¹² Edæ æcänö godöinengä tömengä nänö godonte äinta

tömanta adinque, Æpotadö botö godonguënëmo imoo, ante adinque mänimpotaque godöningue idæwaa. Godömenque nanguï mangampa diyæ nanguï godonguingää.

¹³ Mänömaï äninque botö, Wadäni pönömenque godöningue guëmännönäni mīnitö wæætë mīni eyepote wæquinque godömenque nanguï godoncæmīnimpā, ante dicæ ämogaa. ¹⁴ Wæætë, Cöwë eyepæ bacæimpā, ante ämopa. Edæ mäincoo ñöwo eyepæ mäninque mīnitö nē ænguënente wædäni inänite godömīni ænänipā. Īninque iincayæ ate mīnitö wæætë nē ænguënëmīni bamīni ate tömēnāni wæætë eyepæ mante ate mīnitö imīnite pönönāni æñömīni adopo adopo edæ eyepæ babaimpā. Mänömainö ancæte ante ämopa. ¹⁵ Edæ do yewæmongatimpā. “Cænguï gomonga wææmpo æningä incæ tömengä nänö ænguënenganca ænte baï mäninque godömenque mänämaï ingantapā. Wæætë edæ wædænque wææmpo æningä guiquënë tömengä nänö ænguënenganca eyepæ ænte baï eyepæ mangantapā.” Ante nāni yewæmongainö baï iinque bacæimpā, ante mīnitö imīnite ämopa.

Mīnitö weca Titoidi poncædänimpā, ante

¹⁶ Botö cöwë, Coodintoidi beyæ cæcæimpā, ante mīnitö imīnite waadete pönëmopā. Ayæ, Wængonguï pönö apænecä ëñëninque Tito inömö botö pönëmo baï adobaï pönente cæcampā, ante adinque botö wæætë Wængonguï ingante waa ate pönëninque apænëbopā. ¹⁷ Edæ mönitö, Coodintoidi weca goe, ämöni ëñëninque edæ Tito do Ao ante pongä aedäni. Incæte wīi mönitö äninö beyænque pongampā. Wæætë nämanque pöinente wædinque tömengä nanguï todinque mīnitö weca pongampā.

¹⁸ Ayæ Tito tönö wacä mönö tönĩñacä ingante da pönömöni pongampa. Ìngä Tito tönö në pongä ìñömö tömengä Codito ingantedö ante watapæ möni apænedö ante në apæneçä ingampa. Ìninqe Codito ingante godongämæ nani pönencabo wayömo nani cabo wayömo nani cabo tömänäni tömengä ingante waa ate waa apænedänipa. ¹⁹ Codito ingante nani pönencabo incæ adocä ingante apænte æninqe, Pabodoidi tönö gocæbiimpa, ante da godönäni ate tömengä mönitö tönö godongämæ goquingä ingampa. Edæ mönitö, Mönö Awënë ñäö apäite bai ëmongä ingampa, ante acædänimpa, ante cædinque ayæ, Mönitö wadäni beyæ cæinëmönipa, ante acædänimpa, ante cædinque mīnitö da godonguincoo ænte goquīmōni ìmōnīpa. Mänömaï cæcæte ante goyömöni, Tömengä godongämæ gote cæcæcäimpa, ante da godönäni gocæcäimpa. ²⁰ Edæ wadäni, Pabodoidi babæ cædänipa, ante änämaï incædänimpa, ante wææ cædinque mönitö nö pönī cædinque nanguī pönī mīnitö godonguincoo ænte godinque pædæ godoncæmönimpa. ²¹ Edæ, Mönitö Wængonguī ayongä nö cæmöni inte waodäni ayönäni adobai edonque pönī cædinque nö pönī cæcæimpa, ante cæmönipa.

²² Ayæ wacä mönö tönĩñacä ìñongante mönitö æpogamë cöwä ayömöni tömengä cöwë tömää nö cæcä ìnongampa. Ayæ ñöwo tömengä, Coodintoidi nö cædänipa, ante pönengä inte godömenque waa cædongä ingampa. Mänömaï ingampa, ante adinque mönitö ñöwo tömengä ingante da godömöni godinque tömengä ìñäna tönö mīnitö weca poncæcäimpa. ²³ Tito ìñömö botö tönö godongämæ cöwë cæcampa. Ìninqe mīnitö beyæ guëa në cæmöna ìmōnāpa. Codito ingante nani godongämæ pönencabo incæ mönitö tönĩñada Tito

tönö wada inate da godönäni godinque tömënäni, Mönö Codito ingante waa acädänimpa, ante nangui cæda inapa. ²⁴ Ìnänäni inänite apænedinque mönitö, Coodintoidi në waa cædäni inänipa, ante do apænetamönipa. Ìninqe mīnitö eyepæ godömīni adinque tömënäni, Nāwangä impa, ante edonque acädänimpa. Ayæ adobaï, Mīnitö waadete pönö cæmīni adinque Pabodoidi wæætē mīnitö ìmīnite waa adänipa, ante acädänimpa, ante cædäni. Mänömaï cæmīni adinque Codito ingante godongämæ nāni pönencabo wayömö nāni cabo wayömö nāni cabo tömänäni adobaïnö ante edonque acädänimpa.

9

Mönö wædämaï eyepæ pōni godongæimpa, ante

¹ Nōwo mäninö, Wængongui quinäni beyæ mīnitö godoncæmīnimpā, ante botö idæwaa yewæmömopa.

² Edæ, Mīnitö wædämaï inte do cæmīnipa, ante ëñëninque botö Mäatedöniabæ quëwënäni inänite apænedinque, Acayabæ quëwënäni ìñömö wadepo inöñedë do godoncæte ante cædönänimpā, ante do apænetabopa. Apænebo ëñëninque tömënäni wodo tömänäni, Æ Acayabæ quëwënäni nāni quingæ cæbaï mönö adobaï cæcæimpā, ante cædänipa.

³ Incæte botö ñōwo mönö tōniñadāni inänite da godōmo pōninque tömënäni mīnitö ìmīnite apænedāni ëñëninque mīnitö wæætē eyepæ godoncæmīnimpā. Mänömaï cæmīni ate botö babæ apænedämaï imoi, ante edonque ëñengæimpā. ⁴ Ìñæmpā Mäatedöniabæ quëwënäni botö tönö godongämæ ponte ayönäni mīnitö wīi eyepæ cæmīni adinque tömënäni wæætē, Mīnitö dicæ cæmīniyaa, ante badete tobainänipa. Ayæ mönitö guiquënë, Coodintoidi iinque cæcædänimpā, ante në änīmōni inte odadete guingo imonte wæbaimönipa.

Mīnitō adobai, Mōni cæquēnēnō cædāmaī īmōnīpa, ante guingo imonte wæbaīmīnīpa. ⁵ Īnīnque mīnitō, Godoncæmōnīpa, ante mīni ānīnō bai eyepæ godoncæmīnīpa. Ante cædinque botō mōnō tōnīñadāni īnānīte ānīnque, Mīnitō gote apænemīni ēñēnīnque coodintoidi ædæmō pōnente cæcædānīpa, ante da pōnōmo pōnāni aedāni. Īnīnque mīnitō tōnō godongāmæ cædāni ate mīnitō ædæmō pōnēnīnque, Botō wææ gompodāmaī inte waa todīnque godōmopa, ante godoncæmīnīpa.

⁶ Īmaī ante pōnēedāni. Wædænque quiyadīngā īñōmō amīñāīmō wædænque pete æncæcāīmpa. Nanguī quiyadīngā guiquēnē amīñāīmō nanguī pete æncæcāīmpa. ⁷ Wadāni quī, ante æcānō watapæ todīnque godōnaa, ante adīnque Wængonguī tōmengā īngante waadete pōnengampa. Īnīnque wadāni wææ ānāmaī īñōnāni mīnitō, Botō æpotadō godonguīmoo, ante pōnēnīnque tōmāmīni wædāmaī inte mīni ānīmpota adopota godōnīnque do godonguēnēmīni īmīnīpa. ⁸ Ayæ, Eyepæ pōnī ēamīni inte mīnitō quīēmē cæmīni incæ tōmānāni beyæ ante cōwē godō waa cæcæmīnīpa, ante Wængonguī cæcampa. Īnīnque, Mīnitō eyepæ ænte ēadīnque mānōmaī cæcæmīnīmpa, ante tōmengā nanguī cædongā inte cōwē eyede tate bai waadete pōnō cæcā īngampa. ⁹ Edæ docā īngante ante īmaī ante yewæmongatīmpa.

“Yepanca quiyacā bai īnongā inte tōmengā, Ōmæpodāni quī, ante wayōmō wayōmō godongantapa.

Īnīnque tōmengā nō nānō cædinō īñōmō edæ cōwē ēwēnāmāī ongongæīmpa.”

¹⁰ Ante yewæmongatīmpa. Nē quiyacā īngante Wængonguī, Tōmēmō quīyaquīmō, ante eyepæ pōnōnīnque adobai, Cænguī, ante tōmāmō īmōnte eyepæ pōnongā ænte cæmōmpa. Mīnitō īñōmō eyepæ ēamīni inte

wacä ingä wacä ingä quiyate bai nēnempocæminimpa, ante cædinqe Wængongui mini godonganca da pönöninqe godömenque gomonga da pönongä æncæminimpa. Mänömaï eyepæ da pönongä æninqe mīnitō wæætē nō cædinqe wadāni nanguī ināni inānite nēnempomīni æninqe tōmēnāni wæætē amiñaimō tā pete bai watapæ quēwencædānimpā. ¹¹ Mīnitō pæ gompodāmaï inte wadāni inānite cōwē pædæ godoncæminimpa, ante cædinqe mīnitō imīnite Wængongui nanguī pōni pönongä æncæminimpa. Æninqe mīnitō pæ gompodāmaï inte pædæ godō pædæ godō cæmīni adinqe mōnitō wæætē, Coodintoidi mänömaï cædānimpā, ante tedemōni ēñēninqe wadāni wæætē Wængongui ingante waa ate pönēninqe apænecædānimpā.

¹² Wadāni qui, ante do godōmīni æninqe Wængongui quiñāni tōmēnāni nāni ænguēnēnō ante eyepæ pōni æncædānimpā. Ayæ mīni godönō æninqe tōmēnāni mīmōno eyede tate bai Wængongui ingante waa ate pönēninqe nanguī apænecædānimpā. ¹³ Mönō Codito ingantedō ante watapæ ēñēninqe mīnitō Ao ante do pönēmīnitapā. Ininqe Wængongui nānō änönō ante do ēñente cædinqe mīnitō, Ömæpodāni qui, ante pædæ godōmīni æninqe nē ænāni wæætē Wængongui ingante, Bitō ñāō bai nō pōni cæbi ate coodintoidi bitō änönō ante ēñente cædānimpā, ante watapæ apænecædānimpā. Ayæ nē ænināni inte adodāni godömenque apænedinqe, Nē ömæpodāni tōmānāni inānite da godöninqe coodintoidi iñömō mōnitō imōnite adobai eyepæ pönönāni æmōnimpā, ante Wængongui ingante godömenque waa ate apænecædānimpā. ¹⁴ Ayæ, Coodintoidi inānite Wængongui godömenque nanguī waadete pönō cæcā beyænque tōmēnāni waa cædāni inānimpā, ante pönēninqe nē ænināni iñömō edæ mīnitō imīnite

waadete pönëninque mīnitō beyæ ante Wængonguī ingante apænecædānimpa.

¹⁵ Wængonguī iñömō godömenque waa cædinque mōnō Codito ingante da pōnongä ængamöimpa. In-
inque mōnō, Wængonguī, bitō waa pōni pōnō cægabi-
impa, ante mōnitō ædō cæte eyepæ inte waa ate pō-
nente apænecæimōnii, ante mōnō Wængonguī ingante
apænecæimpa.

10

Pabodo, Itota nänō nē da godöniimo imopa, angampa

¹ Mīnitō, Wayömonque quëwëninque Pabodo nan-
guī piinte angampa, ante pōnëmīnitawo. Wæätë
mōnitō weca pōninque awincadō awinca adinque tō-
mengä guññënete wædinque pæ wëenecampa, ante
pōnëmīnitawo. Iñæmpa mīni änōmo mänimotō inte iimāi
ämopa. Codito iñömō edæ gänë pōnengä inongä inte
pōnō piyænë cæcantawo. Botō adobaï ñöwo piyænë
cædinque mīnitō imīnite pōnō waadete apænecæbopa.

² Pabodoidi iñömō inguipogaque ante pōnente cædānipa,
ante pancadāniya odadete änewënānipa. Tömënāni
inānite botō guññenedāmaï inte nanguī ancæboimpa.
Mīnitō guiquënë adobaï odadete ämīni ininque botō
mīnitō weca pōninque piinte anguënëmo imāimopa.
Ininque, Wīi piinte anguimo bacæboimpa, ante wææ
cæcæte ante botō ñöwo mīnitō imīnite, Ee aquënë
quëwëmīnii, ante waadete pōnente yewæmōmopa.

³ Edæ inguipoga quëwëmōni incæte mōnitō Wæn-
gonguī beyæ ante wæætedō wæätë cæcæte ante cæd-
inque inguipogaque quëwënāni nāni wæætedō wæätë
cæi bai cædāmaï imōnipa. ⁴ Wæätë edæ mōnitō Wæn-
gonguī beyæ ante wæætedō wæätë cæcæte ante cæd-
inque inguipogaque quëwënāni nāni wænoncaquincoo

näænāmaï inte cæmönipa. Wæætë Wængonguï tö-mengä nänö tæï piñämämo ænte mimöno entawën-inque eyepæ næænte bai badinque mönitö tömënäni nāni tæï mænöincö bæ tate bai cædinque wæatedö wæætë nāni godö änewënö ante wido cæte bai cæmönipa. ⁵ Wængonguï ingante pönënāmaï ingæimpa, ante nē pönēwënāni inte ængæ gantidique tömënäni iñömö, Wadāni tömānāni adobāi Wængonguï ingante pönënāmaï incædānimpa, ante cædinque babæ wapiticæ cædānipa. Māniï babæ wapiticæ nāni cædönö ante mönitö wæætë bæ tate wido cæmönipa. Edæ, Codito ingante mönö ëñengæimpa, ante nö apænemöni ëñëninque wadāni idiquibæ pönēwënāni iñönāni mönitö wæætë māninö nāni pönēwënö tömānö ö ænte bai wido cæmönipa. ⁶ Ayæ mīnitö ædæmö nē ëñente cæmīni bamīni ate adocanique incæ ëñënāmaï cæcä adinque mönitö wæætë tömengä ingante do panguimöni imönipa.

⁷ Æbānö i, ante edonque ongö abaïmīnipa. Pan-camīniya, Botö näwangä Codito nempo quëwëmo imopa, ante pönēmīnitawo. Mīnitö mānōmaï pönēmīni inte godömenque iïmaï ante pönenguënēmīni imīnipa. Botö Codito nempo quëwëmo imo bai Pabodoidi adobāi Codito nempo quëwënāni inānipa, ante näwangä impa, ante pönenguënēmīni imīnipa. ⁸ Iñæmpa Wængonguï mönitö imönite äninque, Mīnitö nē ämīni badinque coodintoidi inānite bæ tate wido cædāmaï incæmīn-impā. Wæætë ædæmö ämīni ëñëninque coodintoidi wæætë oncö tæï mænonte bai gongæncædānimpa, ante cæedāni, ante Wængonguï pönö angä ëñëninque mönitö nē ämöni batamönipa. Ininque botö, Nē ämo inte nāmā tocæboimpa, ante tedebo incæte guiñënedāmaï tedecæboimpa.

⁹ Botö, Cadota ante botö yewæmöinta adinque

mīnitō guīñente wæcæminimpa, ante dicæ ämogaa. ¹⁰ Pancamīniya, Pabodo tæi pīñænogä bai inte cadota ante yewæmōninque nanguī angä awædō, ante wæminipa. Wæætē edæ adocä incæ mōnitō weca ponte ongōninque edæ aquiī ingä amōnipa. Tōmengä nänō tedepāmo önömāmoque bai impa, ante pōnēmīni awædō. ¹¹ Īñæmpa, Tæi pīñæmōni inte cadota ante nē yewæmōmōni incæ mōnitō adomōni inte mīnitō weca ponte ongōninque adobaī tæi pīñænte cæcæmōnimpā, ämo ēñēmaīmīnipa.

¹² Pancadāniya nāmā incæ, Waēmō pōni ĩmopa, ante tededāni incæte tōmēnāni nāmā nāni tede bai mōnitō ædō cæte adobaīnō ante tedequīmōnii. Tōmēnāni ĩñōmō, Ægancadō waa cæbo eyepæ inguiī, ante nāmā nāni cægancaque ante adinque edæ, Eyepæ cætawopa, ante pōnēwēnānipa. Tōmēnāni nāni cædō ante, Waa cætawo, ante tee mancæte ante, Do botō cædinō bai adobaī cæbopa, ante adinque, Eyepæ impa, ante pōnēwēnānipa. Mānōmaī nāmā nāni pōnēwēnonque ante cædinque tōmēnāni ēñēnāmaī inte oda cæte cædānipa.

¹³ Mōnitō guiquēnē, ĩngancaque goedāni, ante Wængonguī nänō angancaque cōwē gomōnipa. Īninqe tōmengä, Coodintoidi ganca godinque apæneedāni, angä ēñēninque mōnitō do gote apænedinque, Māningancaque waa cæmōnipa, ante nāmā waa ate tedemōnipa. Godōmenque ante tededāmaī ĩmōnipa. ¹⁴ Mīnitō ganca pōnāmaī inte bai mōnitō, Coodintoidi weca gote do cætāmōnipa, ante tedemōni bai babæ wapiticæ incædōnimpā. Incæte mīnitō ganca do pōninque Codito ingantedō ante mōnitō watapæ mōni ēñēnō ante apænetamōnipa. Īninqe edæ, Māninganca cætāmōnipa, ante māninque ante tedemōnipa. ¹⁵ Ayæ wadāni nāni cædinō ante adinque mōnitō, Tōmēmōni cædinō impa, ante änāmaī

imönipa. Wæætë mīnitō godōmenque godōmenque wede pōnēnōmīni mōnitō wæætë adodō mīnitō weca ponte quēwēnīnque godōmenque gomonga cæyōmōni mōnō watapæ bacæimpa, ante pōnēmōnipa. ¹⁶ Ayæ mīnitō weca iīnque cædinque mōnitō godōmenque gomonga godinque mōnō Codito ingantedō ante watapæ mōni ēñēnō ante apænecæmōnipa, ante pōnēmōnipa. Mānō-mai cædinque mōnitō wacā nānō cædiñōmō ante, Mōnitō māniñōmō cætāmōnipa, ante tededāmai incæmōnipa.

¹⁷ Æcānō, Botō waēmō pōnī inōmo inte waa cæbopa, ante toīnēna tōmengā wæætë, Mōnō Awēnē waēmō pōnī inongā inte pōnō waa cæcampa, ante toquē-nengā ingampa. ¹⁸ Edæ, Waēmō inōmo imopa, ante nāmā ānongā ingante Wængonguī waa adāmai ingampa. Wæætë, ĩngā waēmō inongā ingampa, ante mōnō Awēnē nānō ānongā ingante ante Wængonguī wæætë waa acampa.

11

Wængonguī beyæ, ante pancadāniya babæ apænedānipa

¹ Nōwo botō adodeque ōnonque tedete bai yewæmōmo adinque mīnitō ee amīni iīnque botō waa tobaimopa. Wadō āmo, Mīnitō ee ayōmīni edæ botō ōnonque tedete bai do yewæmōmopa. Iīnque iīmai ante odōmoncæte ante yewæmōmoī aedāni. ² Wængonguī wææ gompocā bai botō adobai mīnitō beyæ ante wææ gompote āmopa. Mīnitō baquecā mōnāmaingā bai iñōmīnite Codito ængā beyænque mīni pōnencabo tōmengā nempo nō cæte quēwencæmīnipa, ante pædæ godoncæte ante cædinque botō tōmengā adocanque ingante, Bitō quīnāni inānite æe, antabopa. ³ Mīnitō nōingā cædinque wacā miñæ godāmai inte Codito ingante waadete pōnēmīni incæte botō, Mīnitō oda cæmīni wæcæ wæ, ante guiñente

wæbopa. Eba wodi ingante Tæntæbo nanguī ēñengä inte babæ cædinque apænecä ēñëninque tömengä nänö oda cægaī baī mīnitö wīi adobaī oda cæcæmīnimpa, ante botö wææ ante apænebopa.

⁴ Mönitö, Itota ingante pönengæimpa, ante do apænemöni ēñëmīnitapa. Incæte wacä mīnitö weca pöningue näwä Itota ingante apænedämaī inte, Wacä Itota ingante pönëedäni, ante babæ apæneyongante mīnitö edæ ēñëë cömīni awædö. Adobaī Wængonguī Önöwoca do ængaimīni iñöminite wacä önöwoca pö guiyongante mīnitö ee æmīni guicä awædö. Ayæ wadäni mönö Codito ingante ante apænedämaī inäni inte, Wacä ængä beyæ quëwengæimpa, ante babæ apæneyönäni mīnitö edæ ēñëë cömīni awædö. ⁵ Mänömaīnö ante nē tededäni iñömö nämä ante pönëninque, Nē gode ämöni inte mönitö ñænæmöni pönī imönipa, ante edæ babæ änewënanipa. Tömënanī näwangä ñænænäni inäni baī botö dicæ wädämo inguënëmogaa, ante pönëmopa. ⁶ Botö æbänö tedeboo, ante ēñëninque mīnitö iñömö, Önönepämoque tedecampa, ante pūmīnitawo. Incæte botö ædæmö adīmo inte nē ēñënimö inte apænebopa. Pabodo mänömaī inongä inte apænecampa, ante acæmīnimpa, ante mönitö cöwë mīnitö imīnite edonque odömömöni amīnitapa.

⁷ Mīnitö imīnite ængö cæte baī cæcæte ante botö Wængonguī ingantedö ante watapæ apænebo beyæ ænämaī intabopa. Mänömaī ænämaī inte botö nämä edæ piinte baī cædinque dicæ wīwa cætabogaa. ⁸ Codito ingante godongämæ näni pönencabo wayömö näni cabo wayömö näni cabo da pönönäni ö æninque botö mänintaque godonte ænte quëwëninque mīnitö beyæ cætabopa. ⁹ Ayæ mīnitö weca ongöninque botö quiëmë æinente wæbo incæ edæ waa atabopa. Wadäni edæ mönö tönīñadäni

incæ Mäatedöniabæ quēwente pöninge tömēnāni botō ænguēnēnō ante eyepæ pönōnāni æntabopa. Īnque coodintoidi botō änō beyæ wædāmaī incædānimpa, ante wææ cædinque botō ĩñömō edæ, Pönömīni æmoedāni, ante cōwē änāmaī intabopa. Ayæ ĩncayæ ate cōwē änāmaī incæboimpa. ¹⁰ Mönō Codito nō nānō apænedō ante ēñente entawēmo inte ämopa. Botō, Mänōmaī cædinque waa cæbopa, ante cōwē edæ tedeyōmote mīnitō Acayabæ quēwēmīni inte edæ wææ cædāmaī incæmīn-impā. ¹¹ Quīnante mänōmaī ante tedeboī. Mīnitō ĩmīnite waadedāmaī inte mänōmaī ante tedeboī. Īñæmpa botō æbānō mīnitō ĩmīnite waadete pönēmoo, ante do againgā inte Wængonguī tömengā ancæcāimpa.

¹² Wadāni guiquēnē, Mönitō Codito nānō nē godongaīmōni ĩmōnīpa, ante nē änāni guiquēnē, Æbānō cæte odömōmōni adinque wadāni Pabodoidi ĩnānite waa adō baī mōnitō ĩmōnite adobaī waa acædānimpā, ante wædānīpa. Īnque botō ĩñömō, Īnāni mänōmaīnō ante odömōnāmaī incædānimpā, ante mänōmaī tedete wææ cæbo inte edæ cōwē godōmenque wææ cæcæboimpa. ¹³ Tömēnāni ĩñömō edæ, Wadāni oda cæcædānimpā, ante awēmō cædāni ĩnānīpa. Mönō Codito tömēnāni ĩnānite da godōnāmaī ingā incæte tömēnāni ĩñömō edæ, Codito nānō da godongaīmōni ĩmōnīpa, ante babæ apænedānīpa. Ayæ edæ mōnitō Codito nānō da godongaīmōni mōni ěmōnō baī önōmoque ěmōnīnque babæ cædānīpa. ¹⁴ Mīnitō, Tömēnāni quīnante wacā baī ěmōnānīi, ante wæmīnitawo. Īñæmpa tömēnāni awēnē Tatāna incæ babæ cædinque Wængonguī anquedoidi ñāō nāni ěmōnō baī ñāō ěmonte baī ěmongampa. ¹⁵ Īnque Tatāna beyæ nē cædāni ĩñömō tömēnāni awēnē Tatāna nānō babæ cædō baī adobaī babæ cædinque, Nē nō Cædongā ingante nē cæmōni ĩmōnīpa, ante önōmoque

ëmönänipa. Īninqe tōmēnāni nē ōnōmoque ëmönāni inte ōnonque ëwente baquinānidō angüēnē.

Æbānō caate wæboo, ante Pabodo yewæmōngampa

¹⁶ Botō ñōwo adodō ante yewæmōmopa. Mīnitō, Pabodo ocai ōmædæcacā inongā inte ōnonque tedecampa, ämīnitawo. Mänōmaīnō ante änāmaī ĩmæwedāni. Incæte wacā ocai ōmædæcacā tedeyongante mīnitō ee amīni tedecā bai botō adobaī ocai ōmædæcabo inte bai, Nāmā waa cæbo imopa, ante adodeque tedebo ĩninqe ee amīni tedeboedāni. ¹⁷ Botō ñōwo mänōmaī nāmā waa ate bai tedete yewæmōninqe mōnō Awēnē nānō ämaī wīi yewæmōmopa. Wæætē ocai ōmædæcacā mā nānō pōnente tede bai adobaī ōnonque tedete bai yewæmōmopa. ¹⁸ Pancadāniya nanguī ĩnāni incæ, Mōnitō nāmā waa cæmōnipa, ante edæ inguipogaque quēwēnāni tededāni bai adobaī tededānipa. Tōmēnāni mänōmaī tededāni ĩninqe botō adobaī, Nāmā waa cæbopa, ante tedecæboimpa. ¹⁹ Nē ēñēmōni ĩmōnipa, ante nē amīni inte mīnitō ĩñōmō ocai ōmædæcadāni ōnonque tedeyōnānite ee ēñēē cōmīnipa tōō. ²⁰ Wacā edæ mīnitō ĩmīnite bæi ongongā wædinqe mīnitō tōmengā ingante ee nē cæmīni bawēmīni awædō. Wacā babæ wapiticæ cædinqe mīnitō quī ingüēnē incæ ō ængā incæte mīnitō edæ ee amīnipa. Wacā mīnitō awēnē bai nāmā ængō cæte angā incæ ee ēñēmīnipa. Wacā mīnitō ĩmīnite pōnō tamongā incæte mīnitō ee ate wæmīni awædō. ²¹ Botō wæætē aquīmo inte, Tōmēnāni nāni nanguī cædō bai ædō cæte cæquīmo, ante botō guingo imonguinque ōnonque tedebopa tōō.

Tōmēnāni nāmanque waa adinqe edæ guīñēnāmaī inte tededānitawo. Botō adobaī nāmanque waa adinqe edæ guīñēnāmaī inte tedecæboimpa. Incæte mänōmaī tededinqe botō ōnonque badete tote bai

tedebopa. ²² Tömēnāni guiquēnē ebedeoidi inānitawo, ante pōnēmīni. Botō inōmō edæ tōmēnāni nāni imāi adobo imopa. Tömēnāni idægoidi inānitawo. Edæ botō tōmēnāni nāni imāi adobo imopa. Tömēnāni Abadāō wodi pāināni inānitawo. Edæ botō tōmēnāni nāni inō bai adobo Abadāō wodi pāimo imopa. ²³ Mōnō Codito beyæ nē cædōnāni inānipa, ante pōnēmīni. Botō edæ tōmēnāni nāni imāi inte edæ gomonga imopa. Incæte mānōmāinō ante tededinque botō ocai ōmædæcacā bai inte ōnonque tedebopa. Tömēnāni inānite adopoque adopoque wædænque cæyōnāni botō godōmenque nanguī cægaboimpa. Tömēnāni inānite wædænque tee mōnedāni wæyōnāni botō imote godōmenque wæætē wæætē tee mōnedāni wægaboimpa. Tömēnāni inānite wædænque tæi pānāni wæyōnāni botō imote godōmenque nanguī tæi pānāni wægaboimpa. Ayæ botō wæætē wæætē wodo wængaboimpa.

²⁴ Oodeoidi æmontaimenca wodo coadenta ganca adoyedē nāni cōwē tæi pāimpoga botō imote adoyedē mānimpoga tæi tæi pāninque ōnompō æmæmpogoncaque wæætē adopoga adopoga tæi tæi pānāni wægaboimpa. ²⁵ Ayæ cantaca mempoga go adopoque botō imote tæi tæi pānāni wægaboimpa. Ayæ adopoque botō imote dicaca tacadāni wangæ wængaboimpa. Ayæ wipodē wogaa godinque mempoga go adopoque wipo tente tobæmpo wægaboimpa. Edæ wīi eyepæ gote botō tōmāā itædē tōmāā woyowotæ tæcæpæno pōni wæwogaboimpa. ²⁶ Wayōmō wayōmō botō ancaa godinque wætabopa. Ōnō æpæmpo wodo bete wæntabopa. Nē ō ænāni incæ botō guiidēnāni incæ wadāni incæ wodo wænōnāni wæmo adinque botō wænguinque ante wægaboimpa. Ayæ tōmēnāni nāni quēwēñōmō quēwēninque, Ōnōmæca

quëwëninque, gäwapaëno owodique botö wænguinque ante wægaboimpa. Ayæ wadäni incæ, Mönö pönencabo ïmompä, ante babæ änäni adinque botö ïñömö edæ, Babæ cædäni wæncæ wæ, ante wægaboï aedäni. ²⁷ Botö pancaönaa tömäa woyowotæ miïmo inte nanguï cædinque wægaboimpa. Tepæ pancaönaa gæwænte wægaboimpa. Pancaönaa cænguï dæ ä ate gue ænente wægaboimpa. Edæ æpogamë pöni cænämaï inte wægaboimpa. Pancayedëña botö weocoo ömaabo inte yoguite wægaboimpa.

²⁸ Mänömaï wædömo inte botö, Codito ingante godongämæ näni pönencabo tömancabodäniya näni wædö ante æbänö cæquïmoo, ante wædinque iïmö iñö iïmö iñö nanguï cæbopa. ²⁹ Edæ wacä aquïngä inte wacä ïninque botö adobaï aquïmo inte baï wæbopa. Ayæ, Wënæ wënæ cæe, änäni ëñëninque adocanque oda cæcä ëñente wædinque botö ædö cæte wæwënämaï inguïmoo.

³⁰ ïninque, Nämä täëmö inte cæbopa, ante tededämaï incæboimpa. Wæætë, Æbänö aquïmo inte cæbopa, ante acædänimpa, ante botö mäninonque ante tedecæboimpa. ³¹ Wængonguï ïñömö mönö Awënë Itota Wæmpocä ïnongä inte edæ tömengä adocä ïñömö Itota Wængonguï ingampa. Tömengä waëmö pöni ïnongä inte cöwë waa pöni cæcampa, ante mönö tömengä ingante cöwë apænecæimpa. Tömengä ïñömö edæ, Pabodo nö angampa, ante do ëñengampa. ³² Ayæ iïmaï cædäni wægaboimpa. Adeto Tidiabæ awënë nänö ïnöñedë mänïñedë botö ïmote bæi ongoncæte ante cædinque tömengä nänö ëmiñängä wædænque awënë ïñömö iïmaï cæcantapa. Tömengä wadäni ïnänite angä ëñëninque tömënäni wæætë Daämaco ïñömö tömënäni näni wini wææ cæincö boyæ yabædemö gäänë wänö cöñönäni, ³³ botö tönö cædäni guiquënë Daämaco näni wini wææ cæincö boyæ

cæimpiticæ inō otodē ñā cædete botō imote pædæ wæænōnāni ti wææ aamō cæte wodii winongaboimpa.

12

Pabodo, Ìimai wüimonte bai atabopa, angampa

¹ Önonque tedebo incæte botō, Waa cætabopa, ante cōwē tedequēnēmo imopa. Ìinque botō ñōwo edæ, Wüimonte bai ayōmo mōnō awēnē mā pōni odōmongā atabopa, ante yewæmoncæboimpa. Ayæ tōmengā, Æbānō ī, ante edonque pōni nānō odōmōnōnō ante godōmenque yewæmoncæ cæbopa. ² Codito nempo nē quēwēmo īñōmote Wængonguī do catodote wadepo īñonte botō imote öönædē wænōmēnæcaönæ mæicā æigaboimpa. Incæte wacā æicā ate bai nāmā incæ agaboimpa. Wabānō öñōwocaque inte æigaboī. Ìintai ēñate wabānō inque inte æigaboī, ante botō adāmaī imopa. Wængonguinque nē ænte mæigaingā inte tōmenganque ēñengampa. ³ Edæ baö ēñate æibo incæ baö ömaabo inte æibo incæ Wængonguinque ēñēñongā botō, Ìimai ingatimpa, ante mäninque ēñēmopa. ⁴ Waēmōnædē tōmengā ömæ īñōmō Wængonguī ænte mæicā æigaboimpa. Mäniñōmō waa pōni apænedāni ēñēmo incæte tōmengā, Ìñōmō mōni apænedō ante mīni waocabo apænedāmaī incæmīnimpa, ante wææ angā ēñēninque botō waobo inte ædō cæte apænequimoo.

⁵ Ìinque wacā mänōmaī öönædē æite ēñengā Ìinque botō, Tōmengā waa pōni cæcampa, ante do apænebai-mopa. Wæætē nāmā botō waa cædōnō ante apænedāmaī incæboimpa. Incæte, Tōmēmo aquīmo inte önonque cætabopa, ante mäninonque ante botō nāmā waa ate bai apænecæboimpa. ⁶ Waa cægaboimpa, ante tedebo Ìinque botō wīi ocāi ömæcabo inte edæ tedebai-mopa. Ìñæmpa nāwangā waa cægaimo inōmo inte botō nō ante

edæ tedebaimopa. Incæte botö wædænque apænete pönömenque cæyömote æcämenque incæ, Pabodo godömenque waa pönï cæcampa, ante änämaï incæcäimpa, ante wææ cædinque botö waa cægainö ante tededämaï inte edæ pæ wëënebopa.

⁷ Wængonguï mä nänö odömongainö æbänö waa pönï ingateï, ante wadäni adämaï iñönäni botö adoboque atabopa. Ìninqe, Pabodo, Botö adoboque nê agaimo ïmopa, ante nämä waa adämaï incæcäimpa, ante wææ cædinque Wængonguï angä ate Tatäna botö ïmote pönö da boo codongate ocæ ocæ coingä bai cæcä wætabopa. ⁸ Mänömaï cæcä wædinque botö mempoga go adopoque Wængonguï Awënë ingante apænedinque, Botö daa cogate bai wæyömote o tongaate bai cæbi quëwëmoe, ante nanguï ante wætabopa. ⁹ Ca wæyömote mönö Awënë wæætë, “Nê aquiï pönï inäni iñönänite botö täï piñämämo eyepæ pönï pönömo æninque tömënanique wæætë täï piñænte entawencädänimpa. Ìninqe bitö nê aquiïmi ïmi beyænque botö waadete pönö cædö iñömö edæ eyepæ pönï impa.”

Ìninqe mönö Codito nänö täï piñænte cæpämo ænte entawencæte ante cædinque botö iñömö edæ, Nämä aquiïmo inte botö wædinö beyæ ante botö nämä waa ate tobopa, ante tededinque godömenque tocæboimpa. ¹⁰ Æyedëno aquiïmo ïmoï mänïñedë edæ täï ëwocaboimpa. Mänömaï beyæ aquiïmo inte botö Codito beyænque nanguï tobopa. Badete tote piïnte cædäni wæbo incæte botö piyænë cædinque tobopa. Ancaa nanguï caate wædinque nangä babo incæ, togænte pänäni wæbo incæ, Ædö cæte quëwenguïmoo, ante wæbo incæ mäninö tömäa beyæ wædömo inte botö Codito beyænque ante piyænë cæte nanguï tobopa.

Coodintoidi æbämë cædäni, ante wæbopa, Pabodo angä

¹¹ Ocai ömædæcacä ingä bai Pabodo önonque tedete yewæmongampa, ante pönëmīnitawo. İñæmpa tømēmīni botö beyæ wææ apænedāmaī imīni beyænque botö tømēmo nāmā wææ cæcæte ante cædinque mänōmaī tedete yewæmōmopa. Wadāni nē gode änāni guiquēnē nāmā nāni waa acabo inānīpa. Incæte tømēnāni nāwangā ñænænāni ināni ininque botö inōmō dicæ wædāmo imogaa. İninque mīnitö tømēmīni, Pabodo waa cæcä ingampa, ante tedequēnēmīni imīnīpa tōö.

¹² Wacä mīnitö weca pöninque æbänö cæcä ate mīnitö, İngä inōmō mönō Codito nänö nē da godongaingä ingampa, ante eñēmīnīi. İmaī impa. Tömengä, Eñencæmīnīmpa, ante mā pönī cæcä ate do eñēmīnīpa. Tömengä bamōnengæ nanguī odōmongā ate eñēmīnīpa. Wadāni cædāmaī inōnāni tømengä täi pīñænte cæcä ate wædinque mīnitö wæætē edæ, Codito nänö nē da godongaingä ingampa, ante do eñēmīnīpa. İninque botö mīnitö weca quēwēninque edæ Codito nänö nē da godongaingä mā cæte nāni odömōnī bai adobaī odömōninque edæ wæntædāmaī inte ee cæbo abaīmīnīpa. ¹³ İninque wadāni Codito ingante nāni godongāmæ pönencabo inānite waa cædinque botö mīnitö imīnite dicæ pönōmenque cætabogaa. Wabänö mīnitö imīnite, Pönömīni æmoedāni, ante änāmaī inte botö mīnitö imīnite wīwa cæboþææ.

¹⁴ Botö do mīnitö weca mempoga pönimo inte ñowo wæætē poncæ cæbopa. Pöninque botö mīnitö māincoo ante änāmaī incæboimpa. Wæætē, Mīnitö botö wēmīni bacæmīnīmpa, ante cæbopa. Wēñænāni tømēnāni mæmpoidi beyæ ante dicæ godonguēnēnāni ināniyaa. Wæætē edæ mæmpoidi inōmō wēñænāni beyæ ante nē godonguēnēnāni inānīpa. ¹⁵ İninque, Mīnitö quēwencæmīnīmpa, ante botö māincoo tōmancoo godōninque waa tocæboimpa. Ayæ, Mīnitö

quëwencæminimpa, ante cæte wæmo ïninqwe waa tobaimopa. Botö mänömaï mïnitö ïmïnite gomonga waadete pönëmo ïninqwe mïnitö wæætë botö ïmote pönömenque waadete pönëmïni ïmïnitawo.

¹⁶ Incæte edæ idæwaa ämopa. Mïnitö mäincoo ante botö änämaï intabopa. Incæte mïnitö, Pabodo nê wënæ wënæ pönengä inte awëmö æncæte ante babæ cæcampa, ante pönëwëmïni awædö. ¹⁷ Wadäni ïnänite mïnitö weca da godöninque botö awëmö æntawo, ante pönëmïnitawo. ¹⁸ Tito ingante, Coodintoidi weca ate pöe, nanguï äninque botö wacä mönö tönïñacä tönö tömengä tönö da godömo guëa godatapa. ïninqwe Tito mïnitö weca pöninque dicæ wïwa cædinque mäincoo ö ængantawogaa. ïñæmpa tömengä tönö botö guëa äawocaque bai ëwocamöna inte mönatö guëa cægömöna adinque mïnitö adämaï inte bai tedewëmïni awædö.

¹⁹ Mïnitö, Pabodoidi nämä wææ cæcæte ante apænedänipa, ante pönëmïni awædö. ïñæmpa mönö Codito nempo quëwënömo inte mönitö Wængonguï ayongante apænetamönipa. Edæ, Botö nê waademïni ïmïni inte mïnitö tæï pïñænte bacæminimpa, ante cædinque mönitö mänömaïnö ante apænetamönipa. ²⁰ Botö ïñömö edæ mïnitö waa cæmïni acæte ante ponte ayömo mïnitö wadö cæmïni bai botö nanguï wæcædömoimpa, ante guïñente wæbopa. Ayæ mïnitö wæætë, Pabodo waa cæcæte ante pongampa, ante pönëñömïni botö wadö cæbo bai mïnitö nanguï wæcædöminimpa, ante pönente wædinque botö, Mönö mänömaï wædämaï ingæimpa, ante wææ cæcæte ante cæbopa. Edæ mïnitö wæætedö wæætë pïinte amïnitawo. Wacä ingante waa cædäni wædinque mïnitö godö pïinte amïnitawo. ïñontobæ ænguï bamïnitawo. Nämanque pönente cæmïnitawo. Wacä ingante pïininqwe godö babæ

ante tedewëminítawo. Godö wëntaa wëntaa äminítawo. Nämä waa adinque cëminítawo. Wii ëñente cëdinque minítö Yæ yæ tedemínítawo. Mäninö tömänö wabänö cëminii, ante guiñente wëdinque botö mänömainö ante edæ yewæmontabopa.

²¹ Ìninque botö ponte ayömo pancaminiya wëenëñedë mini cægai bai ñöwo adobai cëmini adinque botö guingo imonte wæconguënëmo ante awædö. Edæ pancaminiya wëenëñedë wentamö mini mongænö ee mongæmini adinque botö Ca ca wæbaïmopa. Wëenëñedë mini godö towengainö ayæ towëmini intawo. Wëenëñedë ëñënamai inte mini wiwa cëdinö ayæ cëmini intawo. Edæ wentamö mongæmini inte guingo imönämaï imini inte pancaminiya Wængongui gämænö ocæ ëmænte pönämaï iminipa, ante guiñente wæbopa.

13

Idæwaa mäninque yewæmömopa, ante

¹ Botö minítö weca mempoga do pongaimo inte ñöwo wæætë poncæ cæbopa. Ìmaï ante do yewæmongatimpa. Nö nö æbänö cætimpä, ante ëñencæte ante waoda mënaa incæ mengäa go adocanque incæ në adinani inte adodö ante apænedäni ëñëninque do apænte angæimpa, ante nani yewæmongainö ante ëñëninque cæcæboimpa. ² Wëenëñedë wënæ wënæ cëdinani tönö wadäni tömänäni inänite botö minítö weca doyedë pöninque, Ämo ëñëedäni, ante wææ äninque ñöwo wæætë wayömö ongöninque adodö ante wææ ante yewæmömopa. Ayæ ate wæætë minítö weca ponte ongöninque tömanga apænte äninque adodäni inänite ata cæpodämaï incæboimpa.

³ Pabodo wabänö mönö Codito tönö godongämæ cæte apænecää, ante wëminítawo. Mäninö ante mini wædö

ante edæ, Nāwangä impa, ante odömoncæte ante botö mänömaï apænte ancæboimpa. Mönö Codito incæ botö tönö godongämæ në cædongä iñömö tömengä iñömö aquïngä ināmaï inte mīnitö imīnite apænte angä abaïmīnīpa. Tömengä iñömö nanguï tæï piñænongä inte mīnitö weca cæcä apa änewēmīnī. ⁴ Nāwangä impa. Mönö Codito adocä incæ aquïngä baï inte cæyongante waodäni wæætë ñænquedimæ cæte mæo timpodäni wængacäimpa. Incæte Wængonguï nänö tæï piñænö beyænque adocä ñäni ömæmonte quëwengampa. Mönitö adobaï tömengä nempo quëwëninque aquïmōni inte edæ Wængonguï nänö tæï piñænö beyænque mönö Codito tönö godongämæ quëwëninque mīnitö beyæ ante cæquimōni imōnīpa.

⁵ Mīnitö tömēmīni iñömö, Æbänö wede pönëmo imoo, ante nämä waa aedäni. Mīni cædinö adinque, Æbänö nöngä cæbo imoo, ante aedäni. Iñæmpa, Itota Codito ingante entawëmōmpa, ante ëñënämaï imīnitawo. Wabänö mīnitö pancamīniya nämä adinque, Botö nöngä cædämaïmo inte edæ wede pönënämaïmo inte awædö, ante ëñencæte ante aquënēmīni imīnīpa. ⁶ Ayæ nämä mīni a baï mönitö imōnite adobaï apænte adinque mīnitö, Pabodoidi guiquënë nöngä cædönäni inte në wede pönënäni inänīpa, ante edonque amīni waa tobaïmōpa. ⁷ Mīnitö beyæ ante mönitö Wængonguï ingante apænedinque, Coodintoidi cöwë wënæ wënæ cædämaï incædänīmpa, ante apænemōnīpa. Incæte mönitö, Mīnitö wënæ wënæ cædämaï imīni ate wadäni, Pabodoidi ædæmō cædäni beyænque impa, ante mönitö imōnite waa acædänīmpa, ante wīi cæmōnīpa. Wæætë wadäni, Pabodoidi wīi eyepæ cædänīpa, ante piinte änäni incæte mīnitö wæætë nöngä cæcæmīnīmpa, ante mönitö mänīnonque ante cöwë cæmōnīpa.

⁸ Edæ Wængonguï nöngä nänö änö ante në cæmōni

inte mönitö adode ante ædö cæte wido cæquimönii.
⁹ Ìninqe mönitö æyedemë aquimöni iñömöni minitö wæætë tæi piñænte cæmïni adinqe mönitö nanguï tomönipa. Minitö beyæ edæ Wængonguï ingante apænedinqe mönitö, Coodintoidi eyepæ entawëninque picænäni bai nö cæcæðänimpa, ante apænemönipa.
¹⁰ Botö ìmote apænedinqe Wængonguï, Bitö wadäni ìnänite bæ tadämaï inte tæi mænonte bai pönö cæcæbi-impä, ante pönö cæcä ate botö tæi piñæmo badinqe në ämo batabopa. Në ämo ìmo incæte botö minitö weca ponte ayömo wiwa cæmïni adinqe piïnte panguënëmo ìnämaï incæboimpä, ante wææ cædinque botö ñöwo wayömo quëwëninque, Nämä apænte æedäni, ante wææ yewæmömopa.

¹¹ Ìñänäni, mäninqe ante ñöwo yewæmömopa. Minitö eyepæ entawëninque, Mönö picænäni bai badinqe nö cæcæimpä, ante nanguï cæedäni, ämopa. Wæntædämaï inte tæi piñænte cæedäni. Mïni cabo incæ adoyömo pönëninque gänë pönente quëwëedäni. Wængonguï incæ në Waadecä inte në gänë entawengä inte minitö tönö cöwë quëwencæcäimpä, ämopa. ¹² Mïni cabo incæ godongämæ pö bee tëninque waadete pönente waa apæneedäni. ¹³ Wængonguï quïnäni eyequeï quëwënäni iñömö, Minitö waa quëwencæmïnimpa, ante apænedäni eñente yewæmömopa.

¹⁴ Minitö tömämïni mönö Awënë Itota Codito waadete nänö pönö cægäinö ante entawencæmïnimpa, ämopa. Mæmpo Wængonguï tömengä nänö waadete pönënö ante entawencæmïnimpa, ämopa. Wængonguï Tæiyæ Waëmö Önöwoca tönö äawocaque bai ewocadinque tömämïni godongämæ waa quëwencæmïnimpa, ante botö Pa-bodobo mäninqe ante yewæmömopa.

Wængongui nänö Apänegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
